


校刻日本外史

平氏
楠氏

全

特 258


684



始



特258
680



賴襄子成著

校刻日本外史

東京 松雲堂發行



日本外史卷一

源氏前記

平氏

外史氏曰。吾讀舊志。見鳥羽帝時。數下制符。禁諸州武士。屬源平二氏。曰。大權之歸將門也。其在於此時歟。及讀三善清行封事。陳宿衛豪橫之患。乃知制度之弊。其來久矣。非亶始於此也。蓋我朝之初建國也。政體簡易。文武一途。舉海內皆兵。而天子爲之元帥。大臣大連爲之裨裨。未嘗別置將帥也。豈復有所謂武門武士者哉。故天下無事。則已。有事。則天子必親征伐之勞。否則皇子皇后代之。不敢

委之臣下也。是以大權在上。能制服海內。施及三韓。肅慎。無不來王也。及至中世。摹倣唐制。官分文武。乃特置將帥。六衛之將。將天子親兵。而兵部居八省之一。建左右馬寮。以蓄貢馬。而邊要之國。諸郡皆有軍團。三分一國之丁。而取其一。五人爲伍。伍二爲火。火五爲隊。隊二爲旅。旅十爲團。各有首領。一火六馬。便騎射者。特爲騎隊。皆任守令。簡點衛京戍邊。按簿差遣。每舉征伐。令沿道諸國。須契敕勘合。凡征行萬人。乃有將軍。有副將軍。有軍監。有軍曹。有錄事。每總三軍。大將軍一人。大將出征。必授節刀。臨軍對敵。首領不從約束者。皆聽專決。還日具狀以聞。建勲位十二。

一作自
文吏出

等。論功酬賞。而罷其兵。凡其器仗。藏于兵庫。出納以時。皆管之於兵部。中朝制兵。大略如此。雖不及上世之旨。其防亂慮禍。可謂密矣。是故有事則下尺一之符。數十萬兵馬立具。而平時散歸卒伍。爲之將帥者。或出自文吏。臨兵陣。畢事而歸。脫介冑而襲衣冠。未嘗有所謂武門武士者也。及藤原氏以外戚世執政權。卿相之位。非其族人不擬。官論品流。因習成俗。庶僚百揆。概世其職。而將帥之任。每委源平二家。於是乎。始有武門之稱焉。光仁桓武之朝。疆場多事。寶龜中。廷議汰冗兵。殷富百姓。才堪弓馬者。專習武藝。以應徵發。其羸弱者。皆就農業。而兵農全分。至貞觀延

喜之後。百度弛廢。上下隔絕。奧羽關東之豪民。以軍功至六衛舍人者。或坐制鄉曲。不勤宿衛。而守令莫之能制。清行所謂非六軍猛虎。而爲諸國豺狼者。所在皆是。平居藏甲蓄馬。儼然自稱武士。於是乎。始有武士之稱焉。自從天慶。馴致寬治。源平二氏。數鎮東邊。每用此輩。以奏功效。而各有所習用。以相隸屬。因襲之久。如君臣然。自是其後。苟有事。輒命之二氏。二氏各發其隸屬赴之。如探物於囊。不復煩選將徵兵。而討伐勦誅。莫不立辦。廟堂之上。務取恬熙。不憂其勢之積重不回。方且延爲爪牙。以相傾排而已。鳥羽之下。此令也。如察其弊者焉。而不窮弊之所由。於救

之之術。蓋已疎矣。當是之時。源氏。搜命者。勅平氏討之。平氏有難制者。令源氏誅之。更相箝制。以爲得控馭之術。而不知異日搏噬攘奪之禍。又基於此。敗壞古制。苟媮一時。皆足以自取困蹶也。抑戎事民命所繫。而兵食之權。不可一日去國。先王之必躬親之。其旨深矣。今委之一二宗族。又賤其事而不省。至於別其品類。不齒之朝廷之上。甚則奴僕視之曰。是武門耳。是武士耳。及其論功行賞。或恪而不與。嗚呼。幾何其不相率以自棄於法度之外也。特以積威所約。抑不敢發爾。至於保元平治之際。乃乘釁而起。潰裂四出。不復可收。橫流之極。終致失其千歲不拔之權。

而授之嚮所奴僕視者可勝慨哉。吾作外史首敘源平二氏。未嘗不歎王家之自失其權。而國勢之推移。有非人力所能維持者。因世變以見得失。後之憂世者。將有以留心焉。

平氏出自桓武天皇。天皇夫人多治比莫宗生四子。長曰葛原親王。幼有才名。長而謙謹。好讀書史。觀古今成敗。以自鑒。敘四品。任式部卿。子高見。孫高望。高望賜姓平氏。拜上總介。子孫世爲武臣。其旗用赤。高望四子。國香。良將。良兼。良文。並任東國守。介鎮守府將軍。國香子曰貞盛。材武善射。爲左馬允。良將子將門。性桀黠。倚攝政藤原忠平。求

爲檢非違使。忠平不省。將門怒。去之東國。據相馬里。劫掠常陸下總。時國香爲常陸大掾。良兼爲下總介。皆與將門有隙。承平中。將門終攻殺國香。將門之在京師也。嘗詣敦實親王。從兵可五六騎。適貞盛亦來謁。會將門出門。貞盛謂人曰。將門必生事天下者。今日恨不率士卒。卽率士卒者。當擊殺之。至是貞盛棄官而東。欲復父仇。與良兼及從弟良正共攻將門。不利。貞盛謂是私鬪也。不若受敕討之。將還京師。有所請。將門要擊之。信濃。貞盛大敗。脫身入京師。已而良兼卒。將門乃據下總。遂襲執常陸介藤原維幾。取常陸。武藏。守興世王。兇險喜亂。往說將門曰。關東八州。

征東或
作征夷

沃饒而四塞。可據以霸天下。夫取一州。誅取八州。亦誅誅一耳。顧公安所決。將門大悅。延爲謀主。遂攻下野。上總武藏相摸。悉下之。弟將平諫曰。帝王有命。不可妄冀。願孰圖之。將門曰。天縱我以武。吾取帝位。孰能拒之。乃建僞宮於下總。獲島。置文武百官。初將門與藤原純友者友善。嘗同登比叡山。俯瞰皇城曰。壯哉。大丈夫不當宅此邪。遂與謀反。謂純友曰。他日得志。吾王族當爲天子。公藤原氏能爲我關白乎。至是純友爲伊豫掾。任滿不還。據海島爲盜。以遙應將門。潛遣人入京師。行火坊市。京師戒嚴。時天慶二年也。三年。朝廷拜參議藤原忠文爲征東大將軍。率諸將

東伐。發東海東山兵。募以重賞。而任貞盛常陸掾。發兵討將門。將門聞之。率兵索貞盛於常陸。不得。乃散其衆。獨以千餘人至下野。下野有押領使藤原秀鄉。世爲大族。及將門起兵。往見之。將門方梳髮。捉髻而出。款接之。命食共食。飯粒墮前。拾而食之。秀鄉知其輕率不足與有爲也。乃從貞盛。貞盛窺將門無備。與秀鄉合兵四千餘人。急襲之。將門遽出拒之。大敗。貞盛乘勝疾攻。將門欲誘之。險阻。走據島廣山。貞盛火其營。大戰于山北。將門以見兵四百騎。死鬪。貞盛麾兵蹙之。將門獨身出走。貞盛叱咤追馳。射中其右額。墮馬。秀鄉斬其首。與世王以下悉伏誅。梟于京獄。八

後累一作

州皆定。而純友尋平。忠文等皆途還。貞盛以功敘從五位上。累遷從四位下。任鎮守府將軍。兼陸奥守。世呼曰平將軍。貞盛四子。季維衡最勇。與平致賴源賴信藤原保昌齊名稱曰天王。任下野守。後私與致賴鬪。謫徙淡路。貞盛又養從子維茂。亦勇敢。亞維衡。維衡曾孫正盛。有武幹。時平氏與源氏並爲武臣。而源義家樹功邊陲。宗黨尤強。其長子義親爲對馬守。剽掠九州。殺官使。流隱岐。逃歸出雲。殺吏奪貢賦。勢甚猖獗。於是詔正盛爲追討使。賜鐸鈴。率兵討之。與義親戰。斬其首。梟于京獄。時天仁元年也。正盛生忠盛。忠盛居伊賀伊勢之間。爲人眇一目。大治中。山陽南

追逮一作

海盜起。忠盛逮捕有功。事白河鳥羽二上皇。並有寵焉。鳥羽上皇建得長壽院。以忠盛董役。役竣。除但馬守。聽昇殿。舉朝憎之。謀以豐明節會乘暗刺之。忠盛曰。朝則蒙詔。不朝爲怯。其辱宗一也。乃帶刀而入。家人平家貞與其子家長。衷甲從焉。吏訶止之。家貞對曰。主君有戒心。臣將與之同死。吏不得止。忠盛昇殿。就闇拔刀。刀光外射。衆大畏。不敢發。及宴。召忠盛命舞。衆歌曰。伊勢瓶子醋甕。蓋國音瓶子通平氏。醋甕通眇也。忠盛愧之。不終宴。退呼主殿司。脫刀授之。而出。衆劾奏忠盛帶劍上殿。以兵自衛。請正典刑。上皇驚。召忠盛問之。對曰。臣之家人聞道路之言。尾臣而

來不使臣知。唯陛下斷其罪。如其佩刀。請問之主殿司。主殿司進刀。木刀塗銀也。上皇喜曰。忠盛用意良苦。以死衛君。則武人之習耳。遂無所問。忠盛累遷。以正四位下刑部卿。卒於仁平中。忠盛有七子。曰清盛。經盛。教盛。家盛。賴盛。忠重。忠度。而清盛最極寵貴。初忠盛之事白河上皇。上皇有嬖姬。居祇園祠傍。嘗夜幸焉。雨甚。覩鬼髮如束鍼。乍覩乍失。命忠盛射之。忠盛捕而視之。一老僧。束麥稈以代笠。捉火器行吹之。曰。將上燭于祠也。上皇謂忠盛膽勇可倚。益有寵。所幸宮人兵衛佐局與忠盛私。有身。上皇即賜之。曰。生女則朕取之。即男也。卿以爲子也。宮人免身。生男。是

爲清盛。後更娶妻。生家盛。賴盛。清盛出依中御門氏。大治中。任左衛門尉。累遷。至從四位下。安藝守。航海赴任。有魚入其舟。或曰。興家之兆也。先是鳥羽太子受禪。是爲崇德帝。帝母璋子。幼養於白河法皇。鍾愛之。及長不衰。頗涉物議。鳥羽是以不子。視崇德也。戲目之曰。叔父兒。鳥羽寵姬曰得子。號美福門院。生皇子體仁。令崇德養爲太子。四歲受禪。是爲近衛帝。帝崩。崇德希復位。崇德皇子重仁又長而賢。中外屬望。而美福以近衛蚤世。爲出呪詛。乃密勸鳥羽立崇德同母弟雅仁。是爲後白河帝。朝野駭然。崇德憤恚。召左大臣藤原賴長。語之以情。賴長慧黠。世稱惡左府。

與兄忠通爭權不逞。欲使上皇復位而已。專柄也。乃從德
舉兵。物情恟然。保元元年七月。法皇崩。即夜葬之。上皇遂
舉兵。據白河殿。源爲義等屬之。法皇豫度有變。遺命諸將
當召者。清盛不與焉。蓋以忠盛夫妻傳重仁也。美福曰。安
有強如平宗而不召乎。遂召之。清盛舉其宗。應召焉。叔父
忠政獨赴上皇宮。清盛義子基盛爲檢非違使。擒上皇黨
源親治于宇治。已而勅源義朝攻白河殿。留清盛等衛宮。
少納言藤原通憲奏使清盛同往。清盛長子曰重盛。從父
攻其西門。西門將源爲朝善拒。我先鋒二將爲其所射殺。
清盛曰。吾受命不必此門。重盛不肯曰。擇敵而進。豈武臣

所爲乎。兒請當之。清盛令兵士擁止重盛。與共攻南門。白
河殿陷。上皇出走。入如意山。削髮奔南都。途被執。遷于讚
岐。賴長中流矢。已而自殺。帝詔清盛捕爲義。未獲。忠政出。
依清盛乞降。不聽。殺之。朝議因令義朝殺爲義。以清盛爲
播磨守。超遷太宰大貳。重盛以下受賞有差。始興甲第于
六波羅。義朝視平氏聲望出已上也。心常嫉之。藤原通憲
娶清盛女爲婦。亦與義朝有隙。通憲參與大議。多所釐正。
帝授位太子。是爲二條帝。而上皇仍聽政。政在於通憲。上
皇嬖人曰藤原信賴。求爲近衛大將。上皇欲聽之。通憲不
可。因圖唐安祿山事跡上焉。以諷之。信賴慚恨。乃與義朝

深相結納。陰謀作亂。藤原經宗。藤原成親。藤原惟方等。皆與其謀。謀既定。而畏清盛不敢發。平治元年冬。清盛重盛率筑後守家貞等五十人。詣熊野。行至切部。六波羅使者來告曰。昨夜信賴義朝與源賴政源光基等。率兵五百圍三條殿。火之。並火少納言第。殺傷無算。遂幽上皇及主上於禁內。少納言亦遭害矣。眾愕然。清盛曰。爲之何如。宜到熊野計之乎。重盛曰。武臣赴天子之急。何猶豫爲。清盛曰。如無甲何。家貞曰。臣豫慮有是事矣。開其擔。出甲冑五十。器械弓箭稱之。眾乃結束北還。已而聞源氏兵要阿部野。清盛曰。彼眾我寡。我且避之。四國以謀再舉。重盛曰。機不

下失一
作矣屬
上句

可失。失今不伐。彼將先我。我寡而敗。何恥之有。今日之事。有死而已。清盛曰。吾志決矣。率眾疾馳。未至阿部野。遇一騎。眾意源氏使也。騎至曰。臣至自六波羅。六波羅之兵迎駕。見在阿部野。請速歸。眾相喜慶。踴躍入京師。當是時。信賴自爲大臣大將。義朝以下皆拜官。信賴衣冠僭擬乘輿。坐百官上。聽斷庶政。百官莫敢仰視。獨左衛門督藤原光賴不屈。因會議折信賴。勗其弟惟方。護二宮以待清盛。清盛既還。信賴聞之。益諸門守兵。清盛謀怠其備。乃致名簿於信賴。以示無他。清盛計拔帝。乃與惟方通謀。夜放火二條大宮。守門兵舍守救之。天皇乃與皇后同車。蒙衣而伏。

關一作

出藻壁門。惟方從。門者誰何。惟方曰。宮人也。門者燭於車中。曰。可矣。既出。重盛以騎三百迎。謁于途。奉入六波羅。百官萃焉。關白藤原基實亦至。眾以其妻信賴妹也。疑之。或告清盛曰。關白至矣。清盛曰。此大臣也。假令不來。吾固將召焉。眾心乃安。已而上皇又逃於仁和寺。而信賴等仍據大內。帝召清盛命討賊。且戒之曰。宜佯退走。誘賊出宮。莫使宮闕罹兵燹也。清盛對曰。臣誅逆賊。如指之掌。勿以勞天心。至若後命。臣甚惑焉。雖然。不敢不盡心。乃勒兵三千騎。令重盛教盛賴盛將之。分路赴大內。賊開昭明建禮二門。閉陽明待賢郁芳三門。樹白旗二十餘。旒守之。我兵望

見色動。重盛勵眾曰。年為平治。地為平安。而我平氏也。天示吉兆。獲勝必矣。汝輩努力。乃分其兵為二。留一于大宮巷。以其一傳待賢門。大呼挑戰。信賴怖。墮馬。重盛排門而入。至大庭棕樹下。與源義平大戰。紫宸殿前。七匝櫻橘樹。出至大宮巷。杖弓以息。平家貞月之曰。可謂平將軍再生矣。重盛更兵復入。義平呼曰。我源氏嫡子。公平氏嫡子。宜與決死也。重盛曰。諾哉。乃進戰且退。與二卒景安家泰俱走。義平及鎌田政家追之。至二條濠。重盛踰濠。政家射之。中肩及背。甲堅不入。射馬。馬倒而曹墮。政家薄之。重盛扞以弓。取曹被之。景安至。搏仆政家。為義平所殺。重盛怒。欲

親鬪。家泰進與義平相搏。爲政家所殺。重盛得間走。當是時。賴盛等攻郁芳門。與義朝戰。退走。義朝卒有善走者八町二郎。以鐵搭鈎其胄。賴盛拔刀截搭。二郎仰仆。賴盛走。源氏兵空宮而出。教盛乃以千騎橫入大內。關諸門守之。義朝義平無所獲而還宮。宮皆赤旗矣。進退失據。遂進攻六波羅。清盛乃上北臺。踞床指麾。賊兵沓至。官軍遂巡。賊乘勝而進。矢及內戶。清盛怒。上馬大呼馳出。親突敵陣。更兵交進。賊遂大敗走。清盛乃入大內。收名簿。笑曰。昨予今取何速也。乃分兵追賊。義朝奔關東。信賴至仁和寺。乞哀於上皇。上皇爲請之於帝。帝不許。重盛曰。卽宥之。彼何能

爲。清盛曰。首惡不可不誅。且如帝命何。乃遣教盛引兵圍仁和寺。捕信賴。及其黨源師仲藤原成親等五十餘人。斬信賴于六條磧。重盛教盛與成親有姻。乞而宥之。帝賞清盛戰功。進其子弟官爵。尾張人長田忠致。誅義朝。獻其首。梟之獄門。賴盛將平宗清。亦捕義朝少子賴朝至。將斬。宗清憫之。因池尼請宥。池尼賴盛母。於清盛爲繼母。清盛不聽。尼怒曰。刑部卿而在。汝安得侮我言乎。重盛與賴盛固請。乃減死一等。流于伊豆。義平變服入京師。狙擊清盛。清盛覺之。捕獲斬之。平氏威振天下。肥前人日向通良作亂。遣平家貞討夷之。當是時。政在上皇。藤原經宗。藤原惟方。

勸帝親政。兩宮交惡。上皇引清盛自援。永曆元年。上皇進清盛正三位。任參議。清盛乃奉上皇旨。收執經宗。惟方帝嘗納故近衛帝后爲中宮。世呼之二代后。清盛以二人不諫陷帝於惡爲罪。欲斬之。前關白忠通救解。乃宥死。處流。明年。清盛累遷至權中納言。六歲。遂進從二位。任權大納言。重盛至正三位參議。永萬元年。秋。帝崩。諸寺僧徒會葬。延曆園城二寺爭禮。欲鬪。上皇召源賴政自衛。有訛言。上皇圖平氏。平氏大驚。聚兵自守。重盛曰。事必妄也。請往法住寺親驗之。法住寺。上皇宮也。乃往。途遇上皇來。幸平氏第。欲口解諭。因扈還。清盛稱疾不出。重盛入而諫曰。大人

宜出謁。吾宗有功無罪。事何遽至此。大人慎勿形之辭色。不則讒或因以入。苟吾之執忠直。何渠畏人言。清盛善之。而竟不出。上皇還。謂左右曰。訛言。誰使之者。藤原師光前曰。天使之言耳。衆無敢應者。師光。阿波人。嘗以狡黠爲藤原通憲所愛。使後削髮稱西光。爲院北面。頗有寵。心嫉平氏驕恣。數承間說上皇。是時。太子嗣立。是爲六條帝。帝幼。政復歸上皇。上皇寵后滋子。爲清盛妻時子之妹。生憲仁。上皇欲立之。仁安元年。以清盛敘正二位。任內大臣。二年。遂至從一位。陞太政大臣。賜隨身兵仗。聽輦車入宮。敕賜邑于播磨肥前肥後。爲大功田。世襲。重盛敘從二位。任權

大納言聽帶劍昇殿。次子宗盛敘從三位。任參議。三年二月。憲仁受禪。甫五歲。是爲高倉帝。帝母之兄大納言時忠謂衆曰。方今天下之人。非平族者非人也。當是時。平族爲朝官者六十餘人。其采邑跨三十餘州。朝政盡決於清盛。清盛有疾。詔行非常赦以禱之。既而清盛削髮稱淨海。興別第于西八條。居焉。選童三百。服異服。散布京城內外。察誹謗者。輒處法。京師側目。上皇積不能平。嘉應元年。上皇削髮稱法皇。平氏益橫。重盛次子資盛與數騎出獵。途值攝政藤原基房。不下馬。徑衝其衛。衛士猝而下之。重盛責資盛無禮。基房縛送衛士以謝。重盛釋其縛。勞而遣之。清

于一作

盛聞之。怒曰。當今日。誰敢辱淨海之孫者。必報之。重盛諫止。清盛弗聽。伏三百人。要基房于路。摧折其車。切從者髻。帝因輟朝三日。重盛逐資盛于伊勢。承安元年。清盛進其女德子爲女御。遂立爲中宮。四年。右近衛大將闕。重盛奏請自拜之。治承元年。轉左近衛大將。尋拜內大臣。居小松第。弟宗盛爲右近衛大將。已而進正二位。朝臣舉妬平氏。藤原成親以權大納言爲法皇執事。重盛娶其妹。生子維盛。又娶其女爲子婦。成親子成經。娶教盛女。然成親殊希爲大將而不得。居常憤憤。遂圖滅平氏。乃與西光謀。饗藏人源行綱。密語之曰。平氏專恣。子所目也。吾受院勅。陰圖

之而未得將率焉。子源氏冑也。蓋爲我將。成殊功。取顯位。行網諾之。成親遂結檢非違使平康賴。式部大輔藤原章。網前近江守源成雅等。又欲結法勝寺執行俊寬。數飲之酒。令姬人侍焉。因乘間說之。會其鹿谷別館計事。宴酣。馬逸。坐者驚起。誤仆瓶子。成親曰。平氏仆矣。西光曰。盍梟其首。康賴進曰。梟首。檢非違使之任也。取瓶懸之柱上。一坐大笑。成親因建策曰。祇園祭日。京師雜沓。乘此時。縱火平氏第。疾攻之。可以逞矣。乃遣行網布五十匹。部署諸將所向。未發。西光子師高爲加賀守。其目代師經與白山僧徒鬪。僧徒來訴之。延曆寺。延曆寺僧徒與之合兵。入京師。犯

一無門
字

闕。重盛以三千騎衛宮門。擊卻之。山徒不服。還圖再舉。法皇令平時忠往諭解之。五月。誚師高師經流之。西光慚恨。終間叡山座主明雲於法皇處流。明雲素善清盛。清盛爲奏救之。不省。已而山僧奪還明雲。法皇怒。敕諸將士討之。清盛不奉敕。則更救成親。成親大喜。因聚兵。行網自度事。竟不成。不若自首。乃夜馳赴西八條。聞清盛在福原。又赴焉。請面告事。清盛出面之。行網曰。院中集兵。君知其由乎。清盛曰。欲攻山徒耳。行網進附其耳。語曰。否。否。事係貴族。嚮日。新大納言氏俄要行網于鹿谷。謀云云。聞法皇亦欲親臨焉。因法印靜憲諫之而止。事已至此。不敢不告。清盛

大駭。直歸京師。悉召子弟宗族。遣檢非違使阿部資成就院中奏曰。有凶徒圖滅臣宗。臣且執而鞫之。然事必有源。是以敢奏。法皇失色。不知所答。乃縛西光至。使跪階下。清盛叱曰。下奴恃過分之寵。構陷無罪。又敢欲危我家。西光笑曰。何謂過分乎。公之父但馬守。朝官所愧齒。公爲其嫡子。常著高屐。伺候中御門氏。人呼曰高平太。比十八九。以捕海賊二十人功。爲四位兵衛佐。人以其異數焉。而今乃至於太政大臣。是之謂過分耳。清盛大怒。躍起蹴其面。痛掠治之。得實。命裂其口。又使人名成親。成親未知事。覺曰。平公欲宥山徒。令吾請法皇耳。乃往。比及西八條。見甲士

繹騷。心驚。及入門。平氏士難波經遠。妹尾兼康。耦進粹之。囚於小室。將待昏殺之。成經康賴以下。皆被逮捕。久之。重盛至。衆迎而謂之曰。有大事。公來何晚。重盛曰。是私事。何言大事。入謂清盛曰。聞欲殺大納言。願再思之。兒豈以姻戚云爾哉。彼爲名族。受君寵。未可以私怨殺也。往時少納言信西。興行死刑。發惡左府之墳。未二歲。信西之墓。亦爲藤信賴所發。善惡之應。殃慶立至。願再思之。出見經遠兼康。讓其亡狀。因戒之曰。慎勿使我公乘怒抵悔。乃歸。教盛亦爲成經固請。皆得減死。而清盛怒不自禁。乃就見成親。成親低首。清盛呼而仰之曰。公面可憎。公當死於平治者。

因內府之請宥之。祿位並隆。何苦而反。成親曰。僕何與知焉。事必出讒口。僕於貴族。有何所怨。敢倍畔也。清盛顧左右。取西光狀來。乃自讀二過。曰。猶言不與知乎。公面可憎。以其狀擲成親面而入。令經遠兼康拷掠成親。二人畏重盛。下成親于庭。附其耳曰。我公隔壁而聽。君第叫號。二人毆地成親。輒叫。清盛曰。可矣。於是清盛乃被甲執長刀而出。召平貞能曰。亟戒將士。今舉朝之人。嫉我圖我。蓋謂我官爵踰分耳。在昔田村丸微者也。以平東夷功。超拜大將。他多類此者。豈獨淨海。淨海勤勞。非一日也。保元之變。我宗族大半赴新院。且重仁親王者。我父所覆育也。而我思

故院遺詔。獨屬官軍。終克平亂逆。平治之變。信賴義朝之猖獗。吾而自愛。事未可知。重命輕躬。夷滅凶黨。以至於收經宗。惟方等數冒大難。無非爲官家者。以此言之。官家恩宥。雖窮子孫可也。今乃輕信讒言。欲見族滅。卽母告者。豈不危殆。異日細人有再進言。則下宣討我。目我爲賊。不可悔也。吾欲先發移之。烏羽宮。否者。請幸於此耳。北面奴輩。或且扞我。亟戒將士。有主馬盛國者。馳告重盛。重盛大驚。急命駕赴之。入第門。族人皆擐甲鞍馬。旗幟成列。將起重盛。烏帽直衣而入。宗盛叩其袖曰。公何以不被甲。重盛睨曰。汝等何以被甲。敵人何在乎。吾爲大臣大將。自非有寇

賊犯闕。則不宜被甲也。清盛望見之。遽起。表黑衣而出。數正襟。襟吐甲觀。謂重盛曰。吾察西光狀。如成親等。乃其枝葉耳。間群小彙進。覬覦不已。而御以輕躁之君。何所不至。我欲且請幸一邊。以待事定。語未畢。重盛泣數行下。久之。言曰。重盛熟視尊貌。知家門已屬衰運也。重盛聞之。世有四恩。皇恩爲最。抑我門雖辱桓武葛原之胤。而降爲人臣。中微不顯。以平將軍之功。而不過國守。刑部卿聽內昇殿。萬人反脣。及至大人。乃陞太政大臣。以兒之不肖。且辱大臣大將。宗族駢植朝廷。田園半於天下。叨恩極矣。爲官家所疾。誰謂不宜。而運命未艾。讒人旣獲。宜論罪所當。退陳

事由。則公家豈有不齊威。何必草草爲也。兒又聞之。以王事辭家事。不以家事辭王事。況善惡較著者乎。重盛自六位至三公。沐浴君恩。不可勝舉。嚮背之決。自有在焉。素所撫循士。願爲重盛死者二百餘人。保元之亂。源下野守以敕命斬六條判官。兒在當時。以爲大逆無道。不忍言者也。此非大人所親睹乎。欲忠則不孝。欲孝則不忠。重盛進退窮於此矣。生觀是感。不若死也。大人必欲遂今日之舉。先刎重盛首。然後發。且言且泣。舉坐感動。清盛曰。淨海以衰老爲此舉。非爲一身計。徒慮子孫耳。乃以爲不可。汝好計之。乃起入內。重盛顧讓諸弟曰。今日之事。縱令公老老發

事。子等何不匡救。乃憊之也。出敕將士曰。欲從公赴院者。見重盛到首然後行也。乃還小松第。既夜。憂慮弗能措。於是出令徵兵。曰。有大事。速來會。衆相告曰。沈重人出如此令。必有由也。於是爭赴之。一夕二萬餘騎。而西八條無復一人。重盛乃令家貞能往護清盛。清盛問曰。小松第何由徵兵。二人對曰。院宣內府曰。汝父忘君恩。欲亂國家。命汝討伐之。內府慮君自急也。令臣等來護。曰。君安之。重盛在焉。當以身請。清盛惶懼曰。爲我語內府。吾前途已迫。不復事事。唯卿令之。二人還報。重盛連然曰。使父爲此語。吾罪大矣。乃親臨勞兵曰。汝等應召卽來。真不負平生而

事出謬傳。宜亟罷去。後有緩急。幸毋狃焉。因盡罷去。法皇聞之。泣曰。重盛報怨以恩。使人慚愧已。而清盛使武士西光。並殺師高師經。流成親于備前。後使人殺之。放成經。康賴俊寬于硫黃島。教盛常餽。遺成經。成經分之。二人因得不乏。二年。中宮姪清盛月親祈嚴島神。冀得皇子。教盛乃因重盛請。下赦令。成經康賴得歸。俊寬終死島中。十一月。中宮將產而艱。人或曰。成親俊寬所崇。令衆僧禳之。法皇乃爲誦經。卒分身。生皇子。清盛喜極而哭。獻金綿謝之。法皇弗懌。拋其謝書曰。驗者視朕邪。三年。立爲皇太子。清盛驕恣益甚。重盛日夜憂懼。一夕。夢清盛被誅。覺而泣。會

維盛至。飲之酒。令好以刀。維盛意是小鳥。小鳥者。平氏傳家寶刀也。受而視之。乃無文刀。葬時所佩者。乃變於色。重盛曰。毋尤也。使公令終。吾將佩焉。今賜之汝。汝後當知之。五月。重盛造熊野祠。祈死。歸得瘍疾。適有醫。至自宋。清盛欲使治焉。重盛辭以失國體。且曰。兒之獲疾。命也。遂不使治。法皇臨視其疾。三月。遂薨。年四十二。法皇與攝政基房議收其封戶。會中納言闕。清盛婿藤原基通當任。而基房子師家任之。甫八歲。是時。清盛在福原。十一月。地大震。京師相驚曰。太政入道來矣。已而清盛以數千騎入京師。基房入。泣訴法皇曰。聞清盛來。欲修怨於臣。果被竄流。不復

能奉左右矣。法皇曰。雖朕亦不能自保也。明日。使法印靜憲往諭清盛。且問其意。清盛不見。及昏無所答。靜憲請去。清盛使子知盛出答曰。臣耄矣。不復能事君。如此而已。靜憲趨出。颺言曰。賢相明德。跼天踏地。清盛聞之。召返面之。曰。聞子諫。止鹿谷之幸者。吾是以見子也。抑我家何所負官家。重盛新死。遊幸自如。獨不憫老夫乎。重盛見危授命者數。官家賜之。越前曰。傳汝子孫。而死即見褫。死者何罪。且吾爲基通請中納言再三。而超拜師家。何也。凡如淨海者。即有過惡。當宥及七世。今餘命無幾。動將見誅。身後可知矣。言畢垂淚。靜憲亦泣。少焉。說以大義。且慰藉之。清盛

意頗解。禮而遣之。既而奏帝。貶基房。代以基通。削師家以下四十三人官爵。流前太政大臣藤原師長。使宗盛率眾造法皇。法皇問曰。將見流遠地乎。宗盛曰。非敢然也。且幸烏羽殿。以待事定。遂移之烏羽。靜憲請而從焉。清盛乃使人白帝曰。今後諸政。陛下親之。即日還福原。四年二月。帝禪位於皇太子。世稱其出清盛意也。清盛夫人時子。既拜二位。削髮稱二位尼。於是夫妻並准三宮。三月。上皇幸嚴島。希解清盛之意。臨發。覲法皇。法皇之徙烏羽。中外皆咎宗盛。不若其亡兄也。宗盛數諫清盛。乃奉還法皇于八條烏丸。五月。熊野別當上變。告以仁王下令。舉東國源氏。欲

滅平氏。廢帝而自立。曰。事成有重賞。那知新宮僧徒亦應之。清盛大驚。率兵入京師。與公卿議。遣檢非違使源兼綱等。以官兵圍高倉宮。將徙王于土佐。兼綱父賴政。爲王謀主焉。平氏未之知也。賴政急使王先奔倚園城寺。僧徒而自率子弟從之。清盛聞之。怒曰。吾嘗奏賴政。授三位。聽昇殿。何負我乎。清盛將藤原忠清獻策曰。聞叡山南都僧兵皆應於王。我前後防敵。曠日彌久。諸國源氏來會。勝敗未可知也。宜速下院宣於山徒。因啗以利。清盛從之。山徒乃倍王。王奔南都。清盛遣子重衡等。將二萬騎。追擊于宇治河。王入平等院。斷橋而軍。僧徒善鬪。我將平盛清請分兵

由河內進。遮敵前路。下野人足利忠綱進曰。我家嘗與秩父氏夾利根河相挑。未嘗不亂流決戰。今日利在速戰。何猶豫爲。乃以手下三百騎先渡。下令曰。上駿者。下駑者。操於淺而縱於深。其步卒迭相提挈。或溺者。授鎗援之。令畢而濟。不亡一人。忠綱呼曰。我藤原秀鄉六世之孫也。盍來決死。兼綱笑曰。汝以名族。乃爲平氏所驅役邪。對曰。平氏奉詔討亂賊。安得不從也。乃大戰。終射殺兼綱。我軍悉渡。擊大破源氏兵。賴政及子仲綱等皆死。王南出走。中流矢薨。南都僧兵至木津川。聞之引去。重衡等凱旋獻首闕下。清盛賞忠綱。清盛常愛福原。又築島其南。以僂遭運。終欲

遷都焉。六月。遂決意。趣帝三宮百官徙焉。奉帝于賴盛第。遂徙之。已第。使兵守法皇。議建宮城。地狹不可建。乃權造焉。物議莫然。八月。源賴朝奉以仁王令。舉兵伊豆。相摸人大場。景親擊走之。武藏人畠山重忠。又擊破其黨三浦氏。景親急騎報捷。且曰。賴朝走死。已而東人交來告。賴朝未死。兵復振。清盛大怒曰。東國奴輩。皆彼父祖家人。而我流彼於東國。是使彼胥以滅我家也。何異借盜鑰乎。切齒久之。曰。向使吾不聽池尼請。彼惡得保首領。忘恩規利。敢敵我子孫。其能免神明之罰邪。重忠父重能。與弟有重在福原。進而言曰。東人獨北條時政。與賴朝婚。其或附之。其他

豈肯黨流人。君勿爲意。平氏子弟。人人奮願東伐。清盛輦入。見上皇曰。陛下妙齡。蓋未及知耳。往時有爲義朝者。敢行凶逆。欲敵法皇。臣以謀略誅夷之。而義朝少子有賴朝者。此豎子。獲之伊吹岳麓。當斬。臣繼母爲請宥之。臣卽名見之。曰。十三歲。短身涅齒。有問。輒答不知。臣憫其幼稚。且自謂與源氏非有宿怨。特以君命焉爾。遂宥之。今聞其在配所。敢謀不良。臣不堪悔恨。請得宣旨討之。上皇曰。稟法皇。答曰。主上幼。陛下親父。決在聖斷。何直稟法皇爲。陛下莫乃庇源氏乎。上皇哂曰。猶爲此言邪。卽賜宣旨。因問大將可屬誰。曰。臣嫡孫維盛可。卽命維盛。以右近衛中將

爲追討使。而忠度翼之。用高祖正盛伐源義親故事。賜鐸鈴。將五千騎。發福原。以齋藤實盛詣東事。以爲鄉導。行收兵至駿河。實盛曰。宜急踰足柄。收武藏。相摸。兵藤原忠清曰。今我兵皆京畿新募。以此深入。未見其可。維盛從之。實盛乃辭而西。維盛曰。無實盛。吾寧不能戰乎。以忠清爲先鋒。進軍于富士河。當此時。畠山重忠以下皆附賴朝。以二十萬騎至河東。使使者來貽書。多謾言。忠清勸維盛斬其使者。相持未戰。我軍夜聞水禽起。相驚。以爲敵大至也。人馬相踏藉而走。維盛怒。欲留戰。忠清固諫。乃西歸。平明。源氏軍乃知之。令一將來追。伊藤某殿戰而死。維盛歸。至近

江。清盛弗許其入京師。曰。汝奉王命討亂賊。不交兵而歸。何面目來見我乎。軍卽不利。蓋橫尸原野。因欲流維盛。劉忠清衆救解之而止。先是源義仲起兵于信濃。義仲幼孤。齋藤實盛取育之。已而屬之木曾人中原兼遠。於是宗盛召兼遠命亟縛義仲來獻。兼遠效誓書還。遂義仲。是月上皇再幸嚴島。清盛從焉。因要上皇作書誓不右源氏。既還。造宮于夢野。以奉法皇。自清盛遷都上下苦之。山徒亦數請復舊都。清盛會諸公卿問兩都孰便。公卿皆希其旨曰。福原便。獨左大辨藤原長方曰。平安便。清盛作色而入衆。爲長方危之。已而清盛卽奉三宮以下復都平安。衆大悅。

時十一月也。或問長方曰。子何以能忤相國。答曰。使無悔心。何問於人。我因而導之耳。清盛素重長方。先是長方建議於朝曰。亂人得志。是天意人心所致。宜復政於法皇。召還基房師長等。改過遷善。庶幾免焉。清盛稍從其言。平氏家多怪。清盛嘗獨坐。見階下有數百人頭。合爲一大頭。瞋眼視清盛。清盛亦瞋眼視之。人頭漸縮小而滅。占者曰。爲義義朝等鬼也。又有鼠巢廐馬尾。占者曰。小侵大。子犯午。爲源逼平之兆。復都之月。近江源氏兵起。翌月遣知盛資盛等將兵擊夷之。初園城寺黨賴政得重譴。益怨平氏。至是與山徒皆應。近江源氏乃遣清房攻園城寺。燒夷之。殺

僧八百人。又聞南都叛。遣妹尾兼康赴攻。僧徒逆擊敗之。又造木丸。呼爲淨海頭。蹴擊之。清盛積怒。是月遣重衡率兵數千騎擊之。燒東大興福二寺。殺僧數百人。而諸道源氏益興。養和元年。正月上皇病崩。清盛益悔悟。復政於法皇。法皇不聽。固請而聽。乃獻美濃讚岐爲御邑。詔以宗盛總管近畿。二月。斬河內人源義基。聞源行家舉兵至美濃。遣知盛通盛清經忠度等伐之。敵據板倉壘。我兵遠出其後。縱火攻拔之。走行家。清盛又令南海兵控扼東兵。而徵糧于北陸西海。西海菊池氏。緒方氏。皆應源氏。肥後守平貞能請往定之。法皇令院廳官從貞能。已而知盛在洲股。

一無源字

病作。置戍而還。源氏益振。宗盛乃欲親將大軍東伐。法皇許之。命統諸武官。以官符徵兵。刻日而發。衆曰。此行必夷源氏。以二十七日發行。先發一日。清盛疾作。宗盛止行。車馬集於六波羅。清盛病煩熱。浴於冷水。水輒沸。叫號聲徹門外。閏二月。疾大篤。舉族擁枕。問所欲言。清盛大息曰。生者必死。何獨我。我自平治年間。建功王室。專制天下。位極人臣。爲帝者外祖。復何所遺憾。所遺憾者。未睹源賴朝頭而死。吾死之後。母以供佛爲。母以誦經爲。特斬賴朝頭。懸我墓前。我子孫臣隸。咸服我言。勿敢或怠。病七日薨。歲六十四。遺表法皇。事必與宗盛議。清盛既薨。宗盛奉還法皇。

於法住寺殿。奏曰。臣不肖。不能救父過。以至於今。今後將
唯聖旨是仰。法皇乃會公卿。議調兵食。遣重衡。維盛。通盛。
忠度等。入美濃。併其戍兵。與源行家。源義圓。夾水而戰。斬
義圓。破行家。虜行家子。行賴。追行家。至參河。而還。賴朝數
遺書於賴盛。謝其舊恩。又聞上書曰。臣非敢爲亂。乃靖亂
耳。陛下尚不棄平氏。則請兩講和。二姓並仕。如往昔事。其
忠其否。簡在陛下。法皇以書示宗盛。宗盛答曰。臣父臨終。
命臣等曰。必與賴朝決死。語猶在耳。臣不能和矣。於是請
敕陸奧。藤原秀衡。擊賴朝。敕越後。城資長。擊義仲。資長。平
維茂。七世孫也。六月。資長與弟長茂。收兵。南擊義仲。不利。

還。八月。除資長。越後守。秀衡。陸奧守。趣伐源氏。資長復發。
疾作。卒。九月。宗盛遣從弟通盛。經正。東與源氏戰于越前。
敗績。經正走入若狹。通盛退保敦賀城。召經正未至。義仲
兵來攻。乃解兵西還。壽永元年。九月。城長茂復南伐。義仲
復不利。還。是月。宗盛任內大臣。賜隨身兵仗。具騶從。拜賀。
二年。二月。敘從一位。四月。以維盛。通盛。忠度等爲追討使。
將山陽。山陰。西海諸國。及參河以東。若狹以南。徵兵十萬。
餘人。入北陸道。將夷義仲。然後及賴朝也。齋藤實盛在遣
中。謂大場景尚曰。平替源興。盍降木曾。景尚曰。東人無不
知吾輩姓名。以興衰變節。若人言何。實盛曰。吾徒以試子

耳。入見宗盛曰。越前臣鄉也。古曰。衣錦歸鄉。臣受君恩久矣。今老矣。唯有一死以報君。君盍賜錦直垂。臣衣以歸。死有餘榮。宗盛憫之。如其言。義仲聞我軍向越前。遣將守燧城。城據山帶谿。最爲要地。我軍阻谿水不能近。城將有齋明者。爲書約之。矢以射我軍曰。源氏築堤貯水。君決東山。立涸矣。臣爲內應焉。我軍從之。立拔其城。連戰皆捷。追至三條野。敵將齋藤光平出戰。實盛曰。與我同姓。寧死於我。與鬪斬之。我軍長驅定越前。進入加賀。源氏兵退。據安宅渡。平盛俊令子盛綱試水。還報曰。可亂矣。盛俊以兵五千先渡。大軍從之。遂拔林富檜二城據之。降將齋明進言

曰。義仲在越後。越後越中之界。有寒原之險。君宜急扼此。毋使敵踰焉。乃遣盛俊赴之。至般若野。敵已踰寒原。盛俊與戰。不利退。維盛乃以七萬騎軍砥並山。忠度以三萬騎軍志雄山。義仲以五萬騎至。令行家攻忠度。而自當維盛。維盛恃險不備。義仲乘夜來襲。維盛大敗走。義仲乘勝追之。參河守知度。清盛七子也。與五十餘騎大呼冒敵陣。馬仆而徒。敵有岡田親義來擊知度。知度舉刀斫其胄。胄墮。因斬其首。親義子重義踵至。我騎遮鬪。知度自屠而死。敵益進。右兵衛佐爲盛。賴盛次子也。亦爲樋口兼光所殺。維盛退。保佐良岳。當此時。忠度與盛俊擊破行家。而聞維盛

敗。引兵與之合。退據安宅渡。忽有鞍馬十匹。濟水而至。畠山重能在前軍。視之曰。敵近矣。乃與三百騎。登篠原岳。瞰之。馳使中軍。告曰。源氏兵悉濟。臣將先進。請賜後繼。義仲召樋口兼光。指岳頂。問曰。汝知彼一隊將爲誰。曰。畠山重能也。臣數遊武藏。記其旗章矣。義仲曰。此可與鬪者。遣兼光與鬪。殺傷相當。維盛等乃進當義仲。戰且退。至成合。返擊大戰。大場景尚自呼而鬪。義仲曰。名士也。麾騎逆之。景尚斬十三騎。被創自殺。衆悉退。實盛獨留戰。敵將手塚光盛呼問其名。實盛曰。汝斬我首。獻木曾公。公知我也。進薄光盛。光盛從騎遮之。實盛攫騎將殺之。光盛救之。三人相

搏。墜馬。光盛遂刺實盛。獻頭於義仲。告其狀曰。單騎衣錦。其語東音。義仲曰。莫乃實盛乎。召兼光視之。兼光曰。是也。義仲曰。吾知實盛年高。今其髮黑者何。對曰。實盛嘗與臣言於東國。曰。白頭從軍。吾將涅我髮。否則難以伍壯者矣。蓋踐其言也。乃洗其頭。頭髮皆白。義仲泣曰。吾幼孤。爲此老所鞠育。使其來歸。將父事之。乃重恩就死。可不謂義乎。收尸葬之。義仲復追我軍。平盛綱藤原景高等十餘人死之。我諸將敗歸。法皇會議。藤原長方引漢和匈奴故事。請遣使赦諸源罪。不聽。平氏遺書山徒誘之。山徒不從。七月。平貞能既定西海。以降將菊池高直原田種直以下兵千

騎糧十萬石至。平氏咸喜。欲用禦東北。美濃人來告曰。義仲已至近江矣。於是資盛知盛重衡與貞能等守宇治勢多。又遣賴盛繼之。賴盛辭不往。強遣之。已而源行綱等四窺京師。山徒亦黨義仲。宗盛乃召還諸將。遣貞能擊行綱于攝津。知盛以五百騎次粟津。與義仲前軍戰。不利。退。義仲進軍叡山。宗盛大召族人議曰。兵寡。我欲奉帝及法皇奔西國以圖再舉。何如。知盛進曰。不可。我祖桓武實肇此都。後降爲武臣。於今八世。未嘗退避。寧決戰于此。刀折矢盡而後已。教盛經盛等皆以爲然。宗盛不聽。使人造法皇。法皇不在。宗盛大失意。乃奉帝及皇太后皇弟惟明。收劍

璽。縱火諸第。率其子右衛門督清宗。其弟中納言知盛。右中將重衡。淡路守清房。其義弟式部丞清定。丹波守清邦。其叔父參議經盛。中納言教盛。薩摩守忠度。經盛子皇后宮亮經正。若狹守經俊。教盛子越前守通盛。能登守教經。從五位下業盛。知盛子武藏守知章。經俊弟敦盛。清房二弟維俊。良衡。故基盛子左馬頭行盛等。及攝政藤原基通。大納言平時忠而西。權大納言賴盛從而後。比及鳥羽。撤赤幟而東。倚法皇伏匿。基通亦還走。平盛嗣欲追之。宗盛曰。舍之。吾無所用此不義人也。因問曰。小松中將何如。曰。未來。宗盛曰。亦賴盛比耶。乃召畠山重能兄弟曰。汝子弟

在武藏。汝盍東。二人對曰。臣等蒙平氏恩。二十年于此。見危而遁。不忍爲也。宗盛曰。父子相慕。無貴賤一也。父在西。子在東。以相殘滅。吾心憫之。汝宜亟去。從賴朝。二人泣辭。而東。宗盛等至關戶。顧見數百騎至。則維盛也。率其弟右中將資盛。左中將清經。左少將有盛。侍從忠房。備中守師盛來。衆大喜。維盛曰。吾遺妻孥而來。皆啼哭牽我。吾是以後。宗盛曰。衆皆挈家。子何獨否。答曰。挈焉而行。終可庇乎。衆相顧悽然。經正幼仕仁和寺法親王。貺其所愛琵琶。雖征行。未嘗不攜。是日。齎返謁王曰。臣等事已至此。願得一敘別而行。因卽席彈數曲。王及左右皆垂淚。經正曰。臣嘗

欲守此。賜以傳子孫。今行且死亡。不忍并寶器滅沒之。乃奉還琵琶而去。忠度亦自淀河還。詣其和歌師藤原俊成。夜叩門通刺。請面謁。俊成微啓門見之。忠度曰。自兵興。不得數於君門。今當遠別。聞君奉敕有所撰輯。臣幸得收一章焉。死且不朽。乃出其歌集於鎧縫。俊成泣而受之。行盛師俊成子定家。亦遺其集留別焉。俊成定家後並撰集。收二人所作云。於是舉族奉輿而西。會平貞能自攝津還。下馬跪曰。諸公欲何之。宗盛告故。貞能大諫其不可。不聽。貞能獨東入京師。則諸第皆燼矣。乃夜詣重盛墓。白曰。君豫知有今日爾。然願以冥護圖恢復。旦日發墓。收其骨而西。

停一作奪

緒方一作尾形下同

追至福原。宗盛等方會將士。議曰。我家不足惜。如帝王神器。何皆泣而對曰。臣等世受君恩。不以隆替易志。窮海極天。唯君所適。鳥獸且記恩。況於人乎。宗盛喜。乃相率拜清盛墓。張樂於墓前。徹夜天明。燒其宮殿諸第。航赴西海。法皇勅停平族百八十餘人官爵。沒其邑。分賜之義仲等。乃立高倉帝第四子即位。平氏聞之。悔其不取去也。遂奉帝建行在所於豐後。豐後國司藤原賴輔之子賴經。與州人緒方維義。傳院宣收西海兵。使使來告曰。公等不宜止此。時忠讓之曰。正統天子在此。若胡為者。維義不對。以三萬騎來攻。乃遣貞能高直種直等拒之。敗還。乃奔箱崎。遂徙

山鹿。聞菊池原田諸族皆叛。則又徙柳浦。祈于宇佐宮。聞維義來。終航海而遁。清經自度終不可免。夜上舵樓。看月吹笛。投海死。時長門國為知盛所管。其目代紀通資。獻船百餘艘。以徙讚岐屋島。阿波豪傑田口成能以千騎來附。且為徇四國。諭以順逆。多來屬者。因建屋島為行宮。遂徇山陽道。閏十月。源義仲遣足利義清高梨高信海野幸廣來犯。而身繼之。重衡通盛教經以三百餘艘逆擊之。據水島城。源氏以千餘艘負陸。教經出城東北門挑敵。敵以五千騎來攻。教經佯走。重衡通盛將舟師。自島西南縱左右翼遶之。教經豫連舟布板。以便進退。親射殺高信。北兵不

習水戰。屬日蝕晦冥。我兵乘之。北兵遂大敗走。追擊斬義清。幸廣獲首千二百級。初篠原之戰。妹尾兼康爲敵將。倉光成澄所虜。因仕成澄。見親信。今井兼平謂義仲曰。彼瞻視異常。不若殺之。義仲不聽。兼康從容說成澄。以其鄉妹尾地肥美。狀成澄乃請義仲往收之。兼康爲鄉導。先往會其子宗康。以下千餘人。掩殺成澄。據板倉寨。義仲將赴備中。聞而怒。令今井兼平來擊兼康。兼康戰且走。欲赴屋島。宗康體肥不能行。兼康棄之走。行里許。復還視之。追兵薄至。乃刃宗康而死。義仲將遂攻屋島。聞賴朝來討已。則東還。十一月。教盛教經重衡等。與源行家戰室山。大破之。山

陽南海十餘州多來屬者。當是時。義仲縱兵暴掠京師。亦以事怨望法皇。謂將士曰。汝與其敵凡人。寧敵王者。遂舉兵反。焚法住寺殿。矢及乘輿。遂幽帝于閑院。法皇于五條宮。公卿皆裸跣遁。義仲乃謂將士曰。爲帝爲院。唯吾所欲。爲公爲卿。唯汝所請。乃奪公卿以下四十九人官爵。以其妻兄藤原師家爲攝政。京師苦其暴。乃思平氏也。義仲旣與賴朝有隙。恐其來討。欲與平氏爲從。貽書屋島言其意。宗盛欲許之。知盛曰。義仲使我至此極。我乃與之和。恐賴朝之笑我也。公宜答曰。天子在焉。汝免胄弛弓。自來乞降。吾則許之。宗盛從之。明年。以山陽旣定。奉帝復福原。因城

六二
焉。負山臨海，集兵守之。二月，教盛以五百騎屯備中下道。會讚岐廳衆二千騎叛，應源氏乘船過下道，仰射我營。教盛怒曰：「此輩嘗秣我馬，飲我馬者，今敢亡狀如此！」飛舸追之。廳衆走淡路，倚源義嗣、源義久。教盛攻而鏖之，并殺義嗣、義久。遂攻河野，通信於伊豫，通信遁走安藝。與緒方維義合，東入備前，據今木城。教經赴攻，一晝夜拔之。宗盛奏帝，進教盛、正二位大納言，辭不拜。是時，賴朝二弟範、賴義經討義仲，殺之。終以院宣大舉來攻，關東將士悉從之。刻期會戰，知盛、重衡拒東門，貞能等拒西門，而資盛有盛師。盛等以兵七千守北門，義經以萬騎夜襲之，我兵大敗走。

六三
資盛愧之，獨奔屋島。宗盛令諸將代之，皆憚往。教經請當之。卽夜與通盛、盛俊往守北山，範、賴至東門，土肥、實平等至西門，藤原景清等力拒西門，敵不能入。重衡知盛又擊東門，敵卻之。已而義經自間道來襲，縱火城，卒陷。重衡西走，東人莊家長追射其馬，馬倒，其騎騎副馬。重衡呼而取之，騎爲不聞，走。重衡欲自殺，遂爲家長所獲。忠度亦爲岡部忠澄所追。忠度給曰：「吾東兵也。」忠澄曰：「帽而涅齒者，非東兵也。」忠度返鬪，搏忠澄伏之，三刺之，不入。忠澄僕來，終爲所殺。忠澄檢其鎧，得歌稿，因知其爲忠度也。經正走過大藏谷，壯高家呼而求鬪，顧答曰：「吾羞與若鬪也。」高家怒。

通之。經正下馬自殺。其弟經俊。及通盛業。盛師盛清。定清房。盛俊等皆死。通盛妻聞其夫死。投海而死。教經航赴淡路。宗盛奉帝于舟。諸敗兵爭舟。而溺者無數。知盛初爲武藏守。國人識而追之。垂及其子知章。時年十七。遮關斬其一騎。死之。知盛得聞而遁。下馬上舟。舟隘不容馬。則北馬首鞭之。馬躍上陸。田口成能曰。良馬也。與其獲於敵。寧射殺之。知盛曰。吾由此免。不忍殺之。馬望知盛三嘶。終爲義經所獲。知盛謂宗盛曰。子死以救父。父棄子而走。使他人如此。吾當唾其面。今吾爲之。謂之何哉。因歔歔流涕。敦盛亦與知章同齡。望知盛舟馳之。爲熊谷直實所獲。是日直

實冒曉向西門。聞城上有笛聲。及獲敦盛。見其腰插笛。念嚮所聞者是也。乃請首於義經。并其笛。歸之。經盛義經以諸首虜歸。獻法皇。法皇使人諭重衡曰。汝貽書宗盛。使效神器。則宥汝死。放還屋島。對曰。臣宗世建勲王家。而子孫卒爲君所棄。以至於此。命也。勝敗豈關臣一人。臣不才。至爲累囚。假令生還。將何面目見宗族哉。宗族亦必不肯以臣易神器也。雖然。臣不敢不奉敕。乃作書。從院宣使至屋島。時子得書悲泣。欲聽之。知盛執爲不可。教宗盛作答表曰。謹領宣旨。通盛以下既授命矣。重衡豈獨欲生哉。至若神器。不可須臾離聖體也。陛下尚思貞盛清盛遺勲。則辱

枉龍駕臨幸西州。臣等護以西南四道兵。以討亂賊。不者。臣等有赴三韓契丹而已。不能奉命。平時忠捕院使。剽而遣之。法皇怒。以重衡附賴朝誅焉。賴朝檻致之鎌倉。延見。使梶原景時將命來跪重衡旁。重衡不肯聽。遙語賴朝曰。重衡至此命也。公尚記先人之德。則請速賜之死。賴朝乃屬之狩野宗茂。具湯沐。令姬千手侍浴。因問其所欲。重衡欲削髮。賴朝不許。因餽酒。遣千手及工藤祐經佐之。祐經搥鼓。千手彈琵琶。重衡屬杯。千手朗吟曰。燭暗數行。虞氏淚。夜深四面楚歌聲。賴朝微行。側耳戶外。聞而憐之。更遣名姬伊王。與千手更直。明年六月。以南都僧侶請。斬于奈

良阪。二女皆削髮爲尼。云。初重衡之虜入京師也。維盛妻孥在京師。聞三位中將被虜。意其維盛也。使僕視之。非也。然見師盛首。則憂恐。維盛在屋島。亦憶家不措。是歲三月。聞出之京師。途糧不達。於是赴高野山。偶值其舊臣爲僧者。語之以情。曰。先君嘗德賴朝。內府以故猜疑。比吾於賴盛。吾故遁至此。欲一詣熊野祠。赴水而死。乃與俱詣焉。投那智海死。豫命隸人。還告資盛。曰。唐皮甲。小烏刀。在貞能許。公宜取之。萬一事平。幸傳之我兒。初平氏有小烏拔圓二刀。例傳嫡長。至忠盛。傳小烏於清盛。傳拔圓於賴盛。二家自是相惡。賴盛於是在京師。是歲五月。賴朝以書召之。

且曰。必攜宗清。賴盛即東行。宗清不肯從。曰。臣非不辨禍福。獨不愧西海諸公舊僚乎。乃送賴盛至近江。辭而西。來至屋島。是月。貞能弟貞繼起兵伊賀。應平氏集二百人。襲破州守護大內惟能。遂入近江。與源秀義戰而斬之。已而爲惟能所敗。死之。世呼曰三日平氏。平氏欲復山陽道。九月。行盛以兵二千屯兒島。範賴以十萬騎來攻。我軍敗還。宗盛以下日悒悒不樂。知盛曰。吾嚮欲守京師。公等不從。今終如何。宗盛莫以應。明年春。知盛城長門引島。扼門司關。又遣兵擊破土肥實平於備前。復兒島。又擊破河野通信。斬其族黨百六十人。效首屋島。宗盛檢之。時聞源義經

按成良
即成能

自阿波來攻。而未得確報。明日。望高松里。火起。田口成良曰。敵來襲也。請急御舟。令將士拒于陸。從之。義經果襲至。我兵能拒。義經縱火行在。我兵盡上舟。海陸交射。景清上岸挑戰。美尾屋十郎者來鬪而走。景清追攫其銚。銚斷。挂之。雉刀。掀而呼曰。吾景清也。盍來決死。敵莫敢近。我兵踵上大戰。佯卻上舟。以誘致義經。幾獲而逸之。宗盛召教經曰。我兵數逸。義經。義經兵不過數百騎耳。煩公一戰。教經乃與盛嗣景清等三十人。迫陸而射。教經勁弓長箭。射殺敵精騎數十人。會日暮。義經退軍高松。教經軍屋島。欲夜襲源氏。盛嗣與江見盛方爭先。徹曉不果襲。天明。義經以

七千騎來攻。我三十人步行。持短兵接戰。敵騎披靡。教經因射之。戰終不利。遂上舟而退。熊野湛增。河野通信等。盡屬源氏。源氏軍日盛。平氏奉乘輿。避于志度。義經復來攻。乃退保引島。已而長門周防。悉應源氏。乃赴箱崎。聞範賴以大衆在豐後。則旋泊于壇浦。源氏軍充塞海陸。兵艦三千。四面來攻。我有五百艘。知盛立船首。謂諸將士曰。勝敗之決。在於今日。汝輩有進死。毋退生。一心戮力。必獲義經。而後已。景清。盛嗣等。爭願決戰。田口成良。潛通款於敵。知盛謂宗盛曰。士氣奮矣。獨成良可疑。請斬以徇。不聽。固請。宗盛乃召成良勗之。成良唯唯。知盛握刀目宗盛。宗盛終

不能斷也。已而大戰。我兵奮擊。東軍數卻。成良降義經。告之曰。平氏徙帝於兵船。徙兵於帝船。欲誘敵而夾擊之。義經知乘輿所在。合軍疾攻。知盛乃赴帝船。諸嬪迎問狀。知盛大笑。答曰。卿等當睹東國男兒耳。一船皆哭。知盛手掃除船中。盡棄汙穢物。時子乃抱帝。相約以帶。挾劍墮。出立船首。帝時八歲。問時子曰。安之也。時子曰。虜集矢於御船。故將他徙也。遂與俱投海死。皇太后繼投。東兵鈎其髮。獲之。行盛有感聞之。皆力戰死。教經驍名素著。敵爭欲獲之。教經殊死戰。殺敵無數。知盛呼曰。公盍早自爲計。多殺雜兵。毋爲也。教經曰。中納言欲吾與義經決死耳。乃進索義

追一作進

是係壽永四年
事實京師文治
元年也
二年之誤

經卒與之遇。教經免胄，撒鎧袖，躍入其船。敵兵遮鬪，輒搏仆之。直逼義經，敵中有安藝家村力兼三十人，率二力士進當教經。教經蹴仆其一人，挾二人投海死。宗盛與清宗不能自裁，從士擠之海，泅而遁。敵兵鈎獲之。藤原景經、景清從弟也。見之曰：「奴輩敢辱我君，追斬一人，中箭死。知盛聞而切齒久之曰：『吾可以死矣。』與教盛皆自殺。平家長等八人殉之。時壽永二年三月廿四日也。經、盛、資、盛皆遁，已而自殺。宗盛父子與皇弟皇太后平時忠以下從義經而東，有命徇宗盛以下于京師。宗盛自輿中四望，清宗不仰視。既罷，皆拘于義經第。宗盛不解衣，寢以袖庇。清宗守兵

見而憫之。五月，送於鎌倉。賴朝廷之前舍，隔庭相見。將命者至，宗盛悚然請宥死。賴朝措魚于俎，加刀焉，示之。諷使自殺。宗盛不曉其意，又送還京師。至篠原，父子別拘。知將被殺也，乃請僧稱佛曰：「吾不死於壇浦，以有清宗故耳。於是皆被斬。宗盛有次子，曰副將先，斬于京師。初壇浦之敗，時子謂衆曰：「宗盛非故相國之子也。吾之再姓也。相國期其生男，而女生焉。吾恐相國恨怒也。密使人易之一傘工男兒，宜矣。其不若重盛，以至於此也。宗盛既死，時忠等皆處流。時義經與賴朝有隙，逃奔西海。賴朝恐其與平氏遺黨相依託作亂也，遣北條時政于京師，購索平氏胤子，伏

匿所在者。幼孩生理之。稍長者刃之。其母若保。往往隨死。啼哭四聞。維盛子曰六代。依其母。匿大覺寺側。爲人所告。當斬。其乳母因僧文覺請宥。賴朝素重文覺。且思重盛德。已也。特宥之。削髮爲文覺弟子。及文覺圖不軌。六代坐死。初維盛弟忠房。遁壇浦。匿紀伊。知盛次子知忠。當族人西奔時。甫三歲。乳母子紀友方。攜匿備後。後徙伊賀。平氏舊臣藤原忠清。先宗盛一年見捕。斬。平貞能削髮奉重盛骨。隱於常陸。忠清二子。忠光。景清。與平盛嗣等。潛匿各處。後八年。鎌倉有土木事。賴朝臨焉。忠光雜役徒。欲刺賴朝。嵌魚鱗于眼。以爲眇。荷畚出入。賴朝見而怪。執之。懷利刃。曰。

平氏臣忠光。欲爲故主復仇。究問其黨。曰。獨有盛嗣。聞前在丹波。不知今何之。不復言。絕食。飲。月餘死。賴朝大索天下。無所獲。後五年。知忠自伊賀還。入京師。匿于法性寺側。盛嗣。景清聞之。皆至。諸舊臣稍稍來屬。謀襲賴朝妹婿藤原能保。能保覺之。令兵圍攻。我兵二十餘人。亂射殺敵而死。知忠與友方俱自殺。盛嗣。景清遁走。聞忠房在紀伊。往歸之。舉兵據湯淺城。爲熊野別當所攻破。忠房被捕殺。盛嗣。景清又遁。會賴朝慶東大寺。景清雜衆中。欲刺之。事覺。被捕。屬之和田義盛。義盛苦其不遜也。辭之。乃屬於八田知家。景清終不食而死。盛嗣變姓名。仕但馬。人氣比道廣。

爲其廐卒。因通其女。每浴馬爲馳射狀。道廣知其盛嗣而不問。既而隨道廣如京師。遊故妾家。妾家告之源氏。乃令道廣捕之。道廣遣力士數人候其浴圍之。盛嗣罵曰。奴輩。吾欲遁卽遁。而不欲累主人。出而就縛。賴朝面讓之曰。盍死於壇浦。對曰。欲擁一平氏胤。以復舊業耳。又問曰。聞汝依義經。有諸。盛嗣曰。否也。嚮在京。圖判官而不遂。爾來頗儲利刃銳鏃。欲一試之於將軍之身。遂被斬。

外史氏曰。自我先王之開國也。非無僭亂之臣也。而未有謀危社稷者。獨有一將門焉。而出於平氏。豈非其宗之大恥哉。然能討滅之者。亦出於平氏焉。則足以相償矣。且自

將門一伏誅。而後世無復覬覦神器者。可謂彼以其身標天下大戒也。抑使將門得一檢非違使。則未必甘爲反賊。故天慶之亂。皆相門驕傲壅塞上下之所致也。當其無事也。籠朝廷名爵於私門。而不恤人之失職。及其急也。乃遽揭朱紫。呼號天下。使天下英雄有以窺朝廷。後世源平爭起。以功邀其上者。焉知其不基於此也。世稱清盛功不償其罪。舉不臣者。輒以爲稱首。而不知相家不臣已什倍清盛。清盛蓋視而學之。否則何遽至此。詩云。唯其有之。是以似之。自相門之專權也。后皆其女。天子皆其女所生。而卿相皆其子弟親屬。苟非其族類。鋤而去之。雖皇族不能免

焉。甚則易置其主。視猶奕棋。清盛所爲。無一不似彼已氏者。而加以鷙悍。其意曰。以無功之人。猶擅權寵如此。吾之有大造於王室。何爲而不可。世以其拔興之無漸。羣起咎之。而不言有爲之師者焉。且清盛所以至此。由後白河帝養成其勢爾。夫名爵公器。不可私用。人臣而私名爵。是負其君也。人君而私名爵。是負其先王也。帝濫授先王名爵於清盛。藉以濟其私焉。而長其負功邀上之心。至於不可制。將誰咎哉。雖然。成平氏之勢者。不獨始於帝也。初忠盛受寵於白河鳥羽。連進官爵。人以爲不次。蓋朝廷倚其力。以抑源氏。抑源氏。所以殺相家之權也。源氏自滿仲賴光。

每爲相門之爪牙。攝政兼家之騙花山也。源賴信實悍衛道途。降至文治之際。朝廷疑關白兼實之助。源賴朝亦非以其世相黨援哉。由是觀之。延平宗以抗相門。院政廟論。所相傳承。其猶寬平之擢任管氏耶。文武雖異。其意一也。以管公之賢。猶不能無戀權之意。平氏除重盛之外。皆不學無術。其矜功擅寵。進不知止。曷足尤焉。假設重盛後父而死。盡反其所爲。戒飭子弟。輔翼王室。則雖接踵比隆於藤原氏可也。而源氏何資以起哉。源氏名爲治暴亂。而其實攘竊王權。源平之罪未易輕重也。且夫源氏猜忍骨肉相食。孰與平氏闔門至死不失懿親邪。世傳平語倚琵琶。

演之。其音悲壯感憤。聽者莫不悽愴。余嘗西遊長門。過壇浦。觀平氏覆滅之處矣。又抵肥後。聞其州有五家山。山谷深阻。平氏或竄匿焉。子孫至今猶有存者。不與外人交通云。夫平氏於王家。功罪相償。天不必勦絕其後。則是其或然也。

外史氏曰。王權之移於武門。始於平氏。成於源氏。而基之者。藤原氏也。故略敘王室相家之系統。以備參觀云。蓋神祖而後三十九世。曰天智。是爲中宗。天智子大友卽位。而天武以叔父篡立。傳之持統。文武。元明。元正。聖武。孝謙。帝大炊。凡七世。而天武之嗣絕。光仁以天智孫入繼。大統。傳

之其子。是爲桓武帝。桓武三子。平城。嵯峨。淳和。兄弟相及。仁明以嵯峨子繼之。文德以仁明子又繼之。文德幼子。以藤原氏故。卽位。是爲清和帝。清和子陽成。爲藤原氏所廢。光孝以文德弟代之。光孝而下。宇多。醍醐。朱雀。村上。父子相繼。村上之子。冷泉。圓融。兄弟相及。花山以冷泉子繼。圓融。一條以圓融子代。花山。三條又以冷泉子繼。一條。一條之子。後一條。後朱雀。兄弟相及。後朱雀而下。後冷泉。後三條。白河。堀河。鳥羽。崇德。父子相繼。崇德而下。詳於源平語中。崇德而上。至於文德。卅一世。其非藤原氏之出者。宇多。後三條而已。故皆計抑其權。而在位不長。莫能遂志。然

字多以後三朝。不置攝關。政在天子。白河以後。已辭位而猶聽政。政在上皇。其餘皆仰藤原氏之成。而其擅政始於文德云。然余謂藤原氏驕專。其來久矣。非獨始於文德時也。鎌足助天智。效力王室。其子不比等。為四朝元老。文武聖武。並娶其女。而孝謙其外孫女也。而皆淫縱。惠美押勝。嬖於孝謙。殆危國家。實不比等孫。則其家法可知也。其後光仁。桓武。仁明。獨不出於藤原氏。而自平城以下。至於文德。又皆其出。文德外舅左大臣冬嗣。為不比等四世孫。冬嗣之子良房。又納女文德。生清和。文德欲立長子惟喬。而憚良房。遂立清和。則藤原氏之威懾人主。非一日。又可知。

一無以下二字

也。清和生九歲即位。良房以外祖攝政。其子基經。廢陽成。立光孝。關白萬機。攝關之號始此。基經二子。時平。忠平。忠平攝政於朱雀之朝。與其二子實賴師輔。並列三公。於是乎。有天慶之亂。冷泉二弟。為平。守平。村上欲立為平。為冷泉儲貳。而實賴等以其非藤原氏出沮之。而立守平。是為圓融。於是乎。有安和之變。師輔三子。曰伊尹。兼通。兼家。兼家三子。曰道隆。道兼。道長。皆兄弟爭政。伊尹女生花山。兼家女生一條。故兼家令道兼。賺花山遜位。而以一條代之。是其最甚者也。後一條而下三帝。皆道長女所生。是其最極寵榮者也。道長二子。賴通。教通。相繼執政。而賴通生師

議爲一
作議其

實。師實生忠實。忠實疎其長子忠通。而愛少子賴長。於是乎。有保元之禍。忠通三子。基實。基房。兼實。基實生基通。基房生師家。兼實生良經。更執朝政於源平之際。其論議可觀者。獨有兼實。他充位而已。其後一姓分爲五派。更爲攝關。而其進退皆不復關天下事。不足錄也。總之。良房而下。奕葉秉鈞。大抵務營私門。不以國家休戚經心。而當其爭權。父子兄弟。且不相保。奔競從諛。舉朝成風。宜乎。大亂之基於是。而其終與王室俱衰共頽。徒存空名。可不哀邪。外史氏曰。吾閱史。有知王霸所以廢興也。源賴朝嘗奏大江廣元。爲廳使衛尉。攝政兼實議爲不可。曰。非儒家進仕之

例。嗚呼。以門閥爲賢。以格例爲政。驅其才俊。以資梟雄。而猶不覺悟。爭此區區。兼實且然。其他可知。向使相家有憂國之心。通變之略。何患於王權之外移邪。顧嚮者天慶之亂也。亦由藤原忠平之不許廳使於平將門也。久矣哉。相家之沈滯豪傑也。抑將門欲自與也。而以得失爲榮辱。賴朝欲與之其下也。而不以從違爲損益。又可以觀世變矣夫。

日本外史卷一終

日本外史卷五

新田氏前記

楠氏

北畠氏
兒島氏

菊池氏
土居氏

名和氏
得能氏

外史氏曰。予修將門之史。至於平治承久之際。未嘗不舍筆而歎也。嗚呼。世道之變。名實之不相讐。一至於此歟。古之所謂武臣者。勤王云爾。如源氏平氏。莫不皆然。至於平治之後。乘網維之弛。以逞鴟梟之欲。有暴悍無忌者焉。有雄猜匪測者焉。雖所為不同。而其蔑王憲營私利一耳。然猶有可言。曰。王族也。將家也。至於北條氏。以將門屬隸。而

坐制朝廷。天下之事。不復忍言也。且夫承久之事。孰曲孰直。筆而傳之者。皆出北條氏盛時。今安考信焉。況君臣之際。寧可較曲直也。乃指斥憑怒。極其凌辱。視萬乘之尊。不啻如孤豚。嗚呼。八洲生民。誰不被先王之遺澤。當時所謂武士者。徂其豢養。供其使喚。雖名位族望。遠出其右者。奔走驅馳。甘爲之役。之不暇。氣類所名。習以爲常。豈可勝言哉。卽稱爲公卿者。平時趨蹌朝廷之上。取天子之爵秩。以驕天下。而及於此際。未嘗畫一策以救危難。袖手傍觀。以聽其所爲。是曷尤於武人邪。雖時勢有所未可。君德有所未洽。以致乎此禍。而亦臣子之罪矣。自是以來。百餘年間。

廢立黜陟。一仰其處分。而朝廷蹙蹙如被束縛。至於窺其顏色。以爲憂喜。何其甚也。余聞後鳥羽上皇之徙隱岐也。因石窟縛屋。纔庇風雨。十有九年。乃崩。蓋父子三帝。隔絕千里。各居窮海。終天不得相見。是其心何嘗一日忘北條氏哉。則元弘之事。萬不可已也。而其勤王之功。余以楠氏爲第一。微楠氏。則西狩之駕。吾見其與承久歸一轍而止而已。何哉。彼北條氏。雖失於政。其權力有更甚焉。藉累世之威。而加積弱之餘。百萬虎狼。隨其指呼。魚咻中國。莫之或撓。天下方以承久爲戒。重踵屏息。莫敢言勤王之事。而楠公獨以眇眇之軀。唱義其間。當其衝路。挫其爪牙。以鼓

舞四方義士之氣。使之一時踵起。殄戮元惡於斧鉞之下。報列聖之深仇。雪累朝之大恥。天下萬姓。再得仰日月之光。雖曰屬皇運之泰。而非公爲之唱。焉能至此。是焉知非天生斯人。以匡濟世道哉。後之論者。或有比之唐張巡者。巡戴全盛之唐室。拒狂胡之偏師。有二顏爲之先。有許遠爲之助。而不過遮蔽江淮。守城致死。以公視之。勢之難易。功之大小。豈可同日而語也。要之位不滿其器。莫能展其才。而終能以躬殉國。靖獻先王。餘烈所及。不獨其子孫。自公卿。自將士。各執弓箭。以勤王事。概皆聞楠氏之風而起者也。嗚呼。如楠氏者。真可謂不愧武臣之名矣。余故敘楠

氏之事。以繼源平氏云。

楠氏。本姓橘氏。出於敏達天皇。天皇曾孫曰諸兄。爲左大臣。賜姓橘。橘氏後裔。或降在民間。其居河內者。以楠爲氏。楠氏始著於後醍醐天皇之時云。天皇於後鳥羽爲玄孫。後鳥羽二子。順德土御門二帝。並爲北條氏所徙。以崩。後嵯峨帝以土御門之皇子。爲北條氏所立。而常痛先帝之蒙塵。欲俟時報之。而後深草龜山相繼卽位。皆帝之子也。帝謂後深草優柔不足與有爲。而愛龜山有英氣。可以繼其志。故遺詔龜山之後。永承皇統。故後宇多以龜山太子立卽位。而北條氏立後深草之皇子。又立其皇孫承其後。

建定一作

諸本行源字當
刪俊基亦藤原
氏非源氏下
文作殺藤原
俊基

後宇多上皇遣大納言藤原定房。責其再違遺詔。乃立上皇皇子。實後二條帝。遂定兩統更立之議。及帝崩。又立後伏見之弟。時後宇多次子尊治。幼有英質。龜山上皇奇之。遣定房諭北條氏而立之。是為後醍醐天皇。當天皇之時。北條高時失政。其家宰長崎高資等恣權。將士離心。多背叛者。天皇陰謀乘是時討滅之。乃勵精求治。置記錄所。親聽訟訴。與大納言藤原資朝。右少辨源俊基等謀。稍延攬豪傑。置酒款語。破禮節。結驩心。目曰無禮講。美濃人土岐賴兼。多治見國長與焉。賴兼族賴春。娶齋藤利行女。利行。六波羅府吏也。一夕。賴春偶與妻語。泣下。妻問何泣。賴春

告實。妻走告其父。父告之六波羅。府發兵襲賴兼國長。二人力鬪不克。自殺。高時聞之。遣兵來執資朝。俊基。帝因賜誓書。事得寢。乃釋俊基。流資朝。而帝志益銳。與皇子護良謀。收結南都叡山僧徒。高時又覺之。捕僧圓觀等。再執俊基。遂與宰高資定議。欲廢帝如承久故事。遣二階堂貞藤。潛兵西上。夜至六波羅。府將北條仲時。北條時益。得高時書。未發封也。帝謀知之。乃用護良計。御籃輿。逃之南都。使大納言藤原師賢。服袈衣。詐稱帝。赴叡山。僧徒大喜。來聚。一夕得萬人。而仲時時益。謂帝猶在宮中也。遣兵索之。不獲。則收大納言藤原宣房等四人而去。以萬人攻叡山。護

良等擊卻之。而僧徒知帝非真。悉散去。當是時。帝在笠置山。仲時時益聞之。遣兵來攻。未至。帝下詔。四方赴難。莫復應命者。帝憂迫。適夢紫宸殿南有大樹。樹下設虛位。二童子來。垂泣白曰。天下無地容陛下。獨有此座而已。既覺。自念。文木從南楠。當有姓楠人。出扶朕以定禍難。因召山僧。訪之曰。地方豪傑。豈有姓楠者乎。對曰。金剛山之西。有楠正成者焉。正成之父。嘗憂無子。與其妻祈於志貴山。而生焉。少字多聞。長以材武名。嘗平土寇。以功爲兵衛尉。帝曰。是也。使中納言藤原藤房往召正成。正成卽決意赴之。從藤房詣行在。帝使藤房言曰。討賊之事。朕一以託汝。因命

坐問計。正成感激對曰。天誅乘時。何賊不斃。東夷有勇無智。如較於勇。舉六十州兵。不足以當武藏相摸。較於智乎。則臣有策焉。雖然。勝敗常也。不可以少挫折變其志。陛下苟聞正成未死也。則毋復勞宸慮。乃拜辭還。實元弘元年八月也。正成於是城于赤坂。將以奉乘輿焉。而賊兵已圍行在。參河人足助重範善拒。備後人櫻山茲俊起兵應之。高時乃遣北條貞直。足利尊氏等六十三將。以武藏相摸等五州兵十餘萬騎西上。未至而笠置陷。重範被擒。錦織俊政。石川義純死之。帝與藤房奉神器逃。於是貞直等諸軍徑赴赤坂城。城纔成。取農粟充糧焉。兵僅五百人。正成

分其三百。以弟正季族和田正遠將之。出城募山而俟。東軍至。望見其城。可方百餘步。乃憫笑曰。此可隻手掀耳。爭下馬。肉薄攻之。正成令士卒齊射。立斃千餘人。東兵沮卻。卸甲且息。而伏兵自左右起。正成以二百騎闢門突出。三面合擊。東軍大驚擾亂。棄器械而走。旦日。東軍分爲二。一備伏。一圍城。正成豫築複垣。繩懸其外垣。敵蟻附焉。乃斷繩。敵與垣俱墜。乃投大石巨材。殺七百餘人。居四五日。東軍修攻具。蒙楯而進。鐵鈎鈎垣。垣殆崩。正成令城兵人執長柄杓。沃沸湯。敵焦爛而退。東兵於是築營環城。爲持久計。而城內餘五日食。正成謂衆曰。吾先天下舉大事。

固不圖生。雖然。天子在焉。吾未可以死也。吾今佯死。敵則去。去則復起。使彼疲奔命。是全軀以亡敵之術也。衆曰。善。乃鑿坑填尸。以薪蔽之。乘風雨。夜稍稍逃出入金剛山。留一人。誡曰。度我遠而舉火。火起。敵爭上城。見坑中積尸。謂正成既死也。引兵東去。使湯淺定佛代守其城。櫻山氏兵聞之潰散。茲俊自殺。賊執帝于宇治。奉于平等院。遂欲徙之六波羅。帝令備行幸儀。乃往。賊乃立後伏。見帝子量仁。卽位。寶光嚴帝。請帝傳神器。弗聽。請帝削髮。又弗聽。每旦沐浴。拜皇祖如常禮。賊畏憚之。僧良忠謀奪帝。不成。二年。二月。高時徙帝于隱岐。其禮比承久頗厚。參議源忠顯。嬪

爲仁據
太平記
論語原
仁文作
成

藤原氏從。而賊將佐佐木高氏等。以兵三千護送。由山陽道。兒島高德又謀奪之。復不成。

兒島氏本三宅氏。世居備前兒島。兒島範長者。爲備後守。子高德。稱備後三郎。帝之在笠置也。範長高德欲赴援。聞笠置陷。捕氏敗。乃止。已而聞帝西遷。高德謂其衆曰。吾聞志士仁人。有殺身以爲仁。見義不爲無勇也。蓋要奪駕以舉義。衆奮從之。伏舟坂山而待。久之不至。遣人候之。曰。駕向山陰道。乃聞道至杉坂。則已過矣。衆乃散去。高德悵恨不能去。乃變服尾駕而行數日。欲一見帝有所言。而不得。於是夜入帝館。白櫻樹而書之。曰。天莫空勾踐。時非無

范蠡。旦日。護兵聚視。不能讀也。乃奏之。帝熟視之。欣然。心知有勤王者也。帝至隱岐。居國府島。高時遙令隱岐守護佐佐木清高將兵監護焉。又流藤房以下公卿六人。殺藤原俊基等四人。藤原資朝在佐渡。其子國光自京師赴省。父。父已爲本間三郎者所殺。國光夜斬三郎而去。高時遂流皇子尊良宗良恆良。殺恆性。獨第三子兵部卿護良逃奔吉野。於是四方無復勤王之師矣。四月。正成出金剛山。以五百騎攻赤坂城。城將湯淺定佛徵糧於紀伊。正成遮奪之。充苞以甲。使三百人荷至城下。別分兵追之。城兵望見。謂敵且奪我糧也。開門納之。三百人取甲於苞而甲。吶

一〇〇
喊起鬪。正成奪門而入。定佛不知所爲。乃降。正成并其兵。將七百騎。徇河內和泉。悉下之。比及渡部。得二千人。進陣于天王寺。北條氏自徙天子。謂天下無復足虞也。及正成起。則大驚。六波羅二帥遣隅田通倫高橋宗康將五千騎擊之。正成分兵爲四隊。伏其三隊。而以羸兵一隊。扼渡部橋而陣。敵望見易之。輒競渡。羸兵佯走。敵追北過天王寺。陷於伏。急麾兵卻。我兵疾擊乘之。敵兵卻走。不可復制。爭橋而溺者無數。京師爲之謠曰。渡部之川。墜橋決田。二帥愧之。更命宇都宮公綱以紀清兩黨五百騎代赴。正成族和田某請逆戰。曰。我已勝五千。何有於五百。正成默然。良

久曰。勝敗之機。在離同。不在衆寡。公綱素負勇名。而以寡兵承敗。其將士同心於死。可知也。我藉使克之。能無失亡。吾受大任。前途甚遠。而首傷我士。後誰爲我用者。吾將不戰而屈之也。遂拔營而去。公綱代營焉。既夜。望四面皆炬火。漸多。漸近。乃不釋甲。而待者三晝夜。兩黨懼。請歸曰。楠氏兵日加也。公綱乃引歸。正成復軍天王寺。數出耀兵。令軍中禁鹵掠。遠近歸心。多來屬者。正成威振京畿。寺舊藏有上宮太子讖文。正成請僧發視之。文有曰。當人皇九十五代。天下一亂。而主不安。此時東魚來吞四海。日沒西天。三百七十日。西鳥來食東魚。海內歸一三年。如獼猴者。掠

一〇一

天下三十餘年。大凶變歸一元。正成指而諭衆曰。所謂九十五代。非今上耶。東魚乃高時。而爲西鳥所食。則終歸族滅耳。日沒西天三百七十日。上之復辟。蓋在明春。諸君勗之。衆皆奮厲。當是時。皇子護良起兵據吉野。又諭赤松則村勤王。八月。則村起兵播磨。於是京畿警聞。交至鎌倉。高時乃檄東北三道。大發兵。以子時治族高直大臣貞藤將之。而宰高資監焉。西擊正成等。正成相金剛山之千窟城之。城挾山帶壑。周回一里。高數百仞。中有五泉。雖旱不涸。造槽蓄之。養以黃土。雨則引屋溜於槽。乃使別將守赤坂。而自徙金剛山。三年。二月。東兵自三道上。分爲三軍。攻金

剛山。及吉野赤坂。赤坂城兵力拒。殺傷過當。賊絕其水道。城遂陷。吉野受圍七日。乃陷。吉野赤坂既陷。關東三軍皆萃于金剛山。而西南諸道兵應高時徵者亦會焉。稱八十八萬。合勢攻正成。正成以千餘人拒之。賊兵四面仰攻。呼聲動天地。正成令士卒投大石。隨亂射之。無復虛箭。軍監高資今十二史記死傷。三晝夜不閣筆。乃令諸軍勿復薄城。時大旱。賊火箭射城。正成以機注水。使不能焚。賊將高直議曰。葛爾山巔。不容有水。得非乘夜出汲乎。前攻赤坂。絕水而克。此計可襲也。遣名越某將三千人。柵守東溪。久之。毋出汲者。正成暇其倦怠。夜出兵擊走之。奪其幟而還。旦

日。樹之壁上。呼曰。此名越公所贈。有公徽號焉。我無所用。願奉還之名。越慚。悉舉放薄城。城上豫橫懸大木。及敵薄而發之。因射斃四千餘人。賊益畏憚。休戰。築長圍環守。城兵困之。正成乃作藁人數十。被以甲冑。夜列城下。兵伏其後。乘曉霧大開。賊相告曰。城兵窮。蹙出戰也。舉軍競進。我兵頗發矢。輒退入城。而敵集於藁人。則巨石已碎其頭。立死五百餘人。賊不敢復薄城也。三月。高時遣使者督促諸將進攻。諸將合議。命工造雲梯。長二十丈。跨壑架壁。銳兵六千。欲緣乘城。正成令投大炬。唧筒注油。以燒雲梯。烟燄噴起。賊兵前後喧騰。梯遂中斷。陷壑焚死者數千人。諸道

豪傑望正成之風。多應官軍者。護良又命大和土寇。絕敵糧道。敵兵多逃亡。敵中有新田義貞。請護良令。稱疾東歸。謀攻鎌倉。於是六波羅二帥又遣守都宮公綱。以千餘人來援。急攻拔柵。鑿城趾。正成應機拒之。敵竟不能拔。北條氏以天下多勤王者。慮帝逃出。戒佐佐木清高。益嚴防備。而清高放義綱守中門。竊謀脫帝。未敢發。一夜。宮女傳帝旨。賜酒守兵。義綱因白曰。上未聞之乎。楠正成據金剛山。舉義兵。高時以百萬兵攻之。三閱月不能拔也。播磨備前伊豫將士並起應之。或謀迎駕。或窺京師。是皇運將回之秋也。而如聞高時兇懼陰謀不良。上宜急艤千波港。幸出

雲伯耆之間。臣佯追而從之。事必濟矣。帝不輒信。因賜其宮女以察之。義綱志益固。帝乃令先往出雲。誘其族人來迎。義綱往。爲族鹽冶高貞所拘留。帝以其久不返。遂決意。夜僞稱嬪御。與源忠顯徒行逃出。叩一民家。問港所在。主人熟視帝狀貌。知非常人也。乃負帝至港。託諸舟人。舟人亦有感喜色。忠顯告以實。揚帆而南。天明。顧見數十艘。近則清高也。舟人伏帝與忠顯於船底。覆以鯨魚而坐其上。清高來索。舟人曰。何索。曰。先帝逃矣。舟人曰。果有是事。嚮京裝者二人乘船發港。因指曰。在彼。清高赴之。帝遂達名和港。依名和氏。

名和氏。木村上氏。世居伯耆名和。承久之役。有名和行秋者焉。與孫行高從官軍。事敗奪邑。行高四子。長高。長重。長生。氏高。皆有武幹。帝至名和港。令忠顯登岸。問塗人豪族可倚者。答以長高。忠顯乃踵其家。家方宴。忠顯直入傳詔。長高未答。長重進曰。人之所重。名而已矣。今忝受帝者自託。事無成否。皆足以揚大名於天下。長高乃決意。計奉帝于船。上山。令長重等五人擐甲走迎帝。跪御舟傍。帝欣然。長重被薦于甲背。負帝上山。藉木葉進食。長高欲移倉粟于山。募村民能運一擔者。賞錢五百。一日致五千餘石。乃盡燒其宅。率百五十騎。以護行在。因樹植柵。列扉爲垣。氏

高造布旗數百。煤印近國諸豪章識。張之山上。明日清高以兵三千。自山前後來攻。望見旗章。不敢進。我兵蔽林而射。射殺一將。敵八百騎乃來降。清高在山後。未之知也。更兵急攻。會日且入。大雷雨。長重長生乘而疾擊。擠賊于谷。鏖千餘人。清高單舸逃去。帝授長高左衛門尉。兼伯耆守。賜名長年。子弟拜官有差。義綱高貞以千餘騎至。山陰山陽豪族來屬數十姓。而兒島高德從備前往。帝令高德等從源忠顯攻六波羅。長年子義高初應高時徵。圍金剛山。聞長年應官軍。拔歸。亦從忠顯。忠顯行收兵。得三萬人。遇但馬守護太田守延擁皇子恆良來會。合兵軍于峯堂。僧

良忠軍男山。赤松則村軍山崎。皆奉兵部卿護良令。與叡山僧徒約。將戮力入京師。而忠顯欲專功。獨進敗走。守延死之。高德義高留而力戰。忠顯在峯堂。惟怯不安。欲卻軍避敵。使使召還高德等。高德切諫止之。自以三百騎守七條橋。備敵夜襲。夜半顧望峯堂。炬火稍燿。乃恠而還。遇丹後人荻野朝忠。曰。大將逃矣。高德往視其營。則錦幟仆地。鎧裝狼藉。高德取錦幟。追及朝忠。收潰兵。守高山寺。高時聞金剛山久不拔。遣足利尊氏北條高家助攻。率萬騎至京師。忠顯則村破。殺高家尊氏家聲素著。得新帝密旨。欲犯行在意。持兩端。比及丹波。聞高家敗死。乃屬官軍。返攻

京師將士競附之。獨高德不欲附。與朝忠別由若狹路入京師。五月從諸將圍六波羅。結城親光出降。忠顯恐金剛山賊兵解圍來救也。急攻之。伯耆出雲兵聯車數十輛。積以屋材。傅城火之。城兵逃亡相踵。二帥遂東走。死近江。而金剛山之圍始解矣。捷報伯耆。天皇議還闕。親筮之。遇師之蒙。曰。大君有命。開國承家。小人勿用。乃決議二十三日。車駕發名和氏。長年帶劍侍右。百官戎服。至播磨。得新田氏捷報。高時已伏誅矣。正成乃以七千騎迎謁于兵庫。天皇親勞之。曰。今日之事。皆汝忠戰所致。正成曰。不賴陛下威靈。臣安得脫重圍再覩天日哉。詔使正成先驅歸闕。廢

新帝而復位。於是大索賊餘黨。詔以藤原師基爲太宰帥。討鎮西探題北條英時。未發。菊池氏與少貳氏大友氏並馳使報鎮西之捷。

菊池氏本藤原氏。其先政則者。防元寇有功。及子則隆。賜肥後菊池郡。世襲。後十餘世。曰武時。是歲三月。武時與少貳貞經大友貞宗謀應官軍。謀泄。北條英時在太宰府。召武時。武時欲先發。使使小貳大友約期。貞宗依違不答。貞經亦聞京師官軍數失利也。遂斬其使。送首於英時。武時大怒曰。吾誤矣。與此奴輩謀事。奴輩不在。吾寧不能戰乎。乃以百餘騎發過櫛田祠前。馬俄不前。武時曰。何物牛鬼。

一無發字

敢沮義兵。顧射其龕。馬輒前。前攻英時。戰譙門外。克之。前逼內城。英時將自殺。會貞經貞宗以六千騎來救。武時乃遣歸長子武重。自與次子四人進戰。死之。已而貞經貞宗聞京師平。金剛山圍解。則懼。合議攻陷探題府。殺英時。長門探題府亦為土居得能氏所攻陷。

土居得能氏皆出於河野氏。河野與兒島同姓。世著於伊豫。承久時。河野通信者死。王事其庶子。分為兩家。曰土居。曰得能。及元弘時。有土居通治得能通言。皆勇毅好義。是歲二月。並起兵。應官軍。略地土佐。長門探題北條時直以兵艦三百來攻。通治通言逆戰星岡。大敗之。四國兵多來

屬焉。乃艦于今治。欲東攻六波羅。聞金剛山圍解。車駕歸關。則往兵庫謁焉。時直既為二人所敗。走歸英時。英時已死。則從少貳鳥津氏而降。於是天下大定。而金剛山潰。兵聚般若寺。猶數萬人。正成與源定平將畿兵攻之。時治高直貞藤高資公綱等六十人率眾降。皆處斬。獨公綱以特旨宥罪。建武元年。帝論賞戰功。以正成為攝津河內守護。名和長年為因幡伯耆守護。正成任檢非違使左衛門尉。特與長年並直決斷所聽斷訟獄。令天下休兵務農。武人領邑安堵如故。帝以京師之復。為足利氏之功也。歸闕之日。首超擢之。至是又管四大國。尊氏猶失望。陰有異心。帝

以高時邑自奉。以泰家邑賜皇子護良。以貞直邑賜三位局。三位局。即嬪藤原氏。有殊寵。內謁漸行。時諸皇子皆復故。而恆良為藤原氏所生。又生成良義良。意害護良。尊氏潛與合謀。遂構陷之。當是時。帝寢倦政。足利氏資望獨盛。新田氏亞之。正成以下充驅使而已。是歲春。北條憲法作亂。據飯盛山。赤橋重時起伊豫。正成討憲法。土居得能氏討重時。纔平之。而帝游宴自如。益徵珍異。鹽冶高貞獻千里馬。帝出觀之。以為祥瑞也。藤原藤房諫曰。天馬母用於平世。近日賞罰無信。工役繁興。文臣內諛。武臣外怨。而奸雄窺釁其間。天馬之出。烏知非亂兆哉。帝變色入。藤房驟

烏一作焉

諫弗聽。遂舍官遁去。帝驚使追之。不及。二年春。藤原公宗結北條氏餘黨。陰謀大逆。名和長年等奉詔誅之。夏。北條時行等作亂關東。攻陷鎌倉。帝命尊氏往平之。尊氏遂據鎌倉。反。帝震怒。冬。遂詔菊池武重等諸將。從新田義貞。東伐尊氏。正成與名和長年。居守京師。直義拒箱根之險。武重時為肥後守。以其兵先登。仰攻卻敵。追北陣山腹。諸軍乃繼進。而別軍攻竹下。敗退。大友貞宗鹽冶高貞叛。降足利氏。諸軍崩潰。武重以四百騎扶義貞而西。赤松則村等並起應尊氏。帝賜天馬於使者。名還義貞。天馬途斃。延元元年。正月。尊氏直義入犯京師。正成以兵五千守宇治。名

和長年與源忠顯結城親光。以二千守勢多。皆受制於新田氏。新田氏先失大渡山崎之守。尊氏乃入京師。結城親光佯降。欲刺尊氏。不成而死。帝幸叡山。正成聞之。徑赴行在。名和長年欲一視宮闕而行。還入京師。賊軍填塞。長年十七戰而至大內。則諸殿已為賊兵所毀。長年下馬向闕。伏泣久之。終赴行在。信濃人勅使河原某在大渡。未知帝所之。謂其二子曰。吾亡朝之臣。何顏事逆臣哉。亦還京師。自殺于羅城門。賊焚宮闕。進據園城寺。以逼叡山。山徒英憲祐覺等贊拒守之計。祐覺又受詔。以舟七百艘泛湖。迎北畠氏兵入援。

北畠氏。姓源。出於具平親王。世為名卿。及元弘時。有顯家焉。帝復位。以從三位參議拜陸奧守。與父親房。奉義良親王。出鎮東邊。結城宗廣世居陸奧。與其子親光先歸官軍。於是受命副顯家。顯家年甫十七。固辭。乃詔曰。文武不可歧。貴戚掌軍。古之制也。顯家赴任。東邊無虞。尋任鎮守府將軍。及帝討足利尊氏。詔顯家會軍。顯家至鎌倉。則尊氏業已西矣。顯家并程追之。東北兵爭附顯家。凡五萬人。至近江。攻六角氏賴觀音寺城。拔之。斬首五百級。遂至叡山。諸將因會議戰。或欲速襲之。正成等然之。即夜。顯家與諸將攻破園城寺。新田義貞遂復京師。而夜為賊所返襲。敗

還尊氏復入。當是時。諸道賊軍悉聚京師。凡數十萬人。而官軍不滿十萬。諸將分將之。復攻京師。兵各可二萬。正成將五百騎。軍于^多糴林。縱火于出雲路。尊氏令上杉憲顯足利高經等。以東國騎兵五萬來衝擊之。正成豫造楯數百。鈕而聯之。自蔽以射。賊卻。輒縱騎乘之。賊辟易逃走。顯家義貞遂擊走尊氏。而日暮。義貞欲留陣京中。正成往說之。曰。今日我軍克而少所獲。以寡兵屯京中。鹵掠四散。盍懲前日之敗。使敵復振。後難為力也。我且引還。養銳再舉。以驅敵於數百里外。是全勝之策也。義貞然之。乃退陣坂本。尊氏收諸軍。復入京師。正成素蓄一卒善泣者。旦日。教其

退陣上
一有皆
字

卒。與僧數人行物色原隰。賊兵問故。輒泣曰。昨日之戰。七將皆沒。將獲尸葬之。尊氏聞而大喜曰。彼戰勝而退。有以也。乃索義貞正成首。獲稍肖者。梟之以示於眾。其夜。正成遣卒數千。執炬北走。累累不絕。尊氏軍望見。謂官軍喪其將領而潰去也。急分其兵。四出要擊。在者不復設備。正成與諸將合兵。夜發。昧爽。直薄尊氏軍。縱火鼓譟。尊氏軍大潰而走。委甲蔽野。官軍不甚追賊。前者顧後者。以為追兵也。往往自殺。死亡大半。二月。尊氏直義走于湊川。官軍追擊。與直義戰于豐島。勝敗未決。正成後至。遶出敵後。直義不戰而走。會土居通治得能通言。以舟師來援。擊破賊先

鋒大友貞宗兵復擊走直義。尊氏終令赤松則村守播磨而航海走鎮西。菊池武敏武重弟也。時在肥後。聞少貳賴尚發兵迎尊氏也。將三千人追之。至水木渡。賴尚已濟。餘衆待舟。武敏擊殲之。遂攻少貳。貞經于內山斬之。遂與尊氏戰于翰濱。有叛降者。武敏敗歸。菊池城。城尋陷。武敏逃匿山中。於是九國悉附尊氏。尊氏之西也。正成欲窮追之。義貞遷延。及三月乃發。攻赤松則村于白旗城。城固不拔。義貞弟義助說之曰。嚮楠氏據金剛山。北條氏舉天下兵攻之。不克。竭力一城而顧失天下。君盍盪焉。聞尊氏已并九國且東上。君宜分兵圍城而急拔舟坂。以徇山陽。義貞

乃令義助攻舟坂。舟坂賊兵據險不下。初尊氏犯關。山陽皆應之。獨兒島高德以孤軍攻福山城。不克。其兵連叛。乃逃三石山。及聞義助攻舟坂。則喜。遣間使告曰。三石之南有間道。可以出舟坂之背。吾起兵于熊山。使賊分兵。公則一軍由間道夾攻之。必拔舟坂。舟坂拔。則西國無不服者矣。義助大喜。與約期。先期一夜。高德與父範長上熊山。倉卒不及聚族人。兵僅二百。天明舟坂賊果分三千人。七道來攻。高德防戰重傷。終奮擊走賊兵。而義助潛軍出賊後。遂拔舟坂。遣一將據福山。赤松則村馳使告尊氏曰。白旗城陷。則公雖有衆。莫所用之。尊氏乃大舉東上。水陸並進。

據太平
記等書
陣西川
辰者乃
範長高
德非賊
兵也此
未知其
所原

奏
一作

福山城陷。義助引兵退。菊池武重殿之。賊舟師上陸。陣西
川尻。高德聞之。欲合於義助。踰山而東。創劇。範長託之僧
寺。以八十餘人東走。會義貞已釋白旗團。赤松氏兵三百
騎。見範長過。呼曰。敗卒盍釋甲降。範長笑曰。嚮尊氏百方
招我。我輒毀其書投火。今曷降汝輩哉。潰其陣出。賊傳呼
敗卒過。土兵群起。範長悉亡其兵。所餘者六人。曰。悔我不
舉族來。乃伏刃死。賊軍乘勝而進。義貞軍兵庫。飛書告急。
朝廷震動。時北畠顯家已歸鎮。京師兵寡。帝命正成行援
義貞。正成答曰。尊氏新舉九國而來。其鋒甚銳。我以疲兵
格鬪。無他奇道。其敗必矣。爲今計者。陛下復幸叡山。召還

義貞。縱賊入京師。而臣歸河內。絕其糧道。則賊兵日散。我
兵日聚。於是夾而攻之。可一戰而破也。義貞之計。蓋亦出
此。顧慮人言耳。戰道非一。要歸於勝。願朝廷再計之。諸公
卿皆然之。獨參議藤原清忠不可。曰。賊雖衆盛。不過如前
役。王師有天命。宜防之外也。帝從之。正成退。謂其子弟曰。
事已至此。何必抗議。五月十六日。與弟正季子正行等。辭
闕而西。至櫻井驛。正行時年十一矣。正成遣歸之河內。誠
之曰。汝雖幼。已過十歲。猶能記吾言。今日之役。天下安危
所決。意吾不復見汝也。汝聞吾已戰死矣。則天下盡歸足
利氏可知也。慎勿計較禍福。嚮利忘義。以廢乃父之忠。苟

使我之族隸而有一人存者。則率以守金剛山舊址。以身殉國。有死無他。汝所以報我。莫大於此。因以帝所嘗賜寶刀授之。訣別。正行請從共死。正成叱之起。正行揮涕而去。正成乃至兵庫。慰勉義貞。訣飲終夜。當是時。尊氏將水軍。直義將陸軍。陸軍稱五十萬。正成率手兵七百。陣于湊川。以當之。義貞以三萬騎陣于和田崎。以扞水軍。水軍先鋒過而東。義貞拔軍循之。而尊氏全軍已上和田崎矣。正成顧謂正季曰。我腹背受敵。不可遁也。先破前者。而後接背者。如何。正季曰。然。於是兄弟並突入陸軍。七離七遭。欲獲直義。直義馬傷而墜。我兵垂及。有一敵將。遮鬪而逸之。尊

按武朝之死。係太平正朝。然武朝是武政之子。武光之子。孫於武時。為曾孫。其病死。非見後。非武重。弟也。日本史。據菊池系。

氏亦分兵來援。包我軍後。正成兄弟回馬當之。血戰十六合。盡亡其騎。所餘七十三騎。猶可以潰圍。而正成心不欲生。乃走入湊川北民舍。坐釋鎧。身被十一創。顧謂正季曰。死而何為。曰。願七生人間。以殺國賊。正成欣然曰。是獲吾心。耦刺而死。正成年四十三。宗族十六人。從士五十餘人。悉死之。菊池武重在義貞軍。使弟武朝來視湊川戰狀。會正成且死。不忍去。亦死之。義貞敗退。尊氏入京師。送正成首於河內。一家聚哭。正行起入室。其母尾而闕之。則執父所授刀。將自殺。母徑入。奪刀而泣曰。汝何惑焉。乃父之遺歸汝。豈教汝自殺也。汝啣遺命。歸來告我。而女先忘之。惡

圖及武
朝申狀
改作武
吉武時
是武子
第七子
武重之
弟武光
之兄

能任王事。正行大悟。自是以討國賊復父讐為志。常與兒
童嬉戲。為馳逐狀。曰。追足利也。為斬首狀。曰。獲尊氏元也。
楠氏族黨多死。湊川。而河內紀伊之間。猶有義故存者。皆
思戴正行。當是時。天子避賊於叡山。名和菊池土居得能
氏。皆從義貞扞禦。源忠顯戰沒。官軍遂出攻京師。路人指
名和長年曰。正成忠顯等既死。獨有此人。及戰大敗。長年
退至大宮巷。自閉後門。與二百人力戰死。冬。尊氏佯降。請
帝還闕。菊池武重等從之。皇子宗良走遠江。懷良走大和。
義貞以詔奉皇太子恆良。及尊良親王之北國。土居通治
得能通言等從之。通言與族通繩殿會大雪。至鹽津。迷失

道。適值賊兵將士凍飢。不能操兵。三百人皆植刀于地。伏
之。自貫而死。通治與諸將守金崎城。城陷。力戰自殺。尊良
薨。太子被虜。入京師。帝之還闕也。尊氏已擁立新帝之弟。
是為北朝光明帝。請帝傳神器焉。帝弗聽。尊氏囚帝于花
山院。殺從行者僧祐覺等。拘執其餘。獨三條景繁得待。景
繁潛進計。逃幸大和。帝夜服婦人衣。由壞牆出。扶上馬。景
繁荷神器從。夜方黑。逢赤電照路。比曉。達穴生。遣景繁諭
吉野僧宗信。宗信嘗助將軍護良者。於是先衆來迎。正行
聞而大喜。與從弟和田正朝等馳赴之。護駕入吉野。河內
紀伊將士相踵來衛。官軍復振。帝思正成死王事。追贈正

按中將
舊誤作
少將今
改之

三位左近衛中將。敘正行正四位下。爲帶刀。遂襲父官。任檢非違使左衛門尉。兼河內守。於是建行宮于吉野。號令四方。先是菊池武重從帝被拘。候守者懈。逃歸據菊池。帝因拜皇子懷良爲征西將軍。赴菊池。大館氏明亦逃。如伊豫。土居通治子通鄉。得能通言子彈正。迎而起兵。北畠顯家弟顯信亦起兵於伊勢。而顯家討國內叛者。據靈山。明年秋。顯家欲入援。行在得結城宗廣等兵。奉義良親王。軍白河關。兵來屬者數萬人。進與尊氏子義詮相拒。利根川。齋藤實永亂流先渡。全軍繼之。水激於西岸。賊兵漂溺。敗走。顯家追北。攻義詮於鎌倉。走之。三年春。與宗良親王合

不利一
作少利

兵偕赴京師。賊兵大起。擁後。顯家回戰于青野原。破之。聞尊氏遣高師泰來迎。乃轉出伊勢。師泰尾擊。顯家回戰于雲津川。破之。至南都。結城宗廣曰。避敵於行宮。不若攘賊於王城。顯家從之。逢賊兵逆擊。顯家敗走。乃使兩親王赴行宮。自收敗兵。軍安部野。五月。高師直來襲。顯家與二十餘騎衝圍而死。名和義高死之。宗廣走歸吉野。師直遂圍顯信於男山。顯信善拒。出擊不利。賊縱火登城。城兵擊走之。已而糧竭。潰圍走河內。帝初遣廷臣將兵救顯信。又詔北國將士援之。義貞欲驟赴援。兒島高德從在軍中。說曰。前日之敗。以賊絕我糧道。今無若遣數千人據叡山。取糧

颯
一作

北陸而時出擾京師。是深根固蒂之策也。請貽書山徒焉。義貞從之。山徒肯之。義貞遣義助赴之。望男山火。遂巡而去。尋義貞戰死。結城宗廣請及顯家餘威未盡。收東邊兵。帝令宗良親王先發。至遠江待之。遂以顯信襲兄官職。與親房及宗廣奉義良親王。海路赴任。遇颯於天龍洋。舟四散。親房抵常陸。宗廣至安濃津。顯信與義良親王抵篠島。宗廣病死。四年三月。顯信奉親王歸吉野。先是皇太子及成良親王皆為尊氏所鴆。弒乃立義良為皇太子。八月。帝獲疾大漸。乃遺詔曰。朕憾不滅國賊平天下。雖埋骨於此。魂魄常望北關。後人其體朕志。竭力討賊。不者。非吾子孫。

非吾臣屬。按劍而崩。帝已崩。群臣氣沮。欲逃散。僧宗信力言止之。已而正行與正朝率兵二千來衛。眾情大安。於是相與俱奉太子。拜神器。即位。是為後村上天皇。頒先帝遺詔於四方。興國元年春。土居通鄉得能彈正等奏。請得一將帥。會新田義助戰敗。與兒島高德等來詣吉野。因詔義助赴伊豫。無幾何。病死。高德等逃歸備前。五月。賊將細川賴春來攻河江。通鄉彈正推金谷經氏為將。舟師赴救。值賊海上戰不利。轉攻取鞆城。據之。拒賊十餘日。聞賴春已陷河江。將攻世田。勸經氏救之。選死士三百。選凶日而發。與賊七千戰於千町原。盡亡其卒。與經氏等十七騎。潰圍。

還遣一作

走備後。自是西南官軍不振。是歲北畠顯信居白河。親房居小田。賊將高師冬以大兵來攻。親房請援於結城。親朝親朝。宗廣子也。宗廣臨死遺言討賊。而親朝送款於尊氏。以故不輒援。數月。城將出降。親房走。保關城。親房從子顯時保大寶城。賊陣二城間。父子數出力戰。而城且陷。親房間使告顯信。使率親朝子弟來救。親朝擁之不遣。四年春。親房手書切諭。親朝弗聽。遂降賊。親房走歸吉野。自是東北官軍不振。顯信留居陸奥。於是四方勤王之師所在耗散。而足利氏勢威擅天下。正行在金剛山。漸保聚義。故時出兵攝津。縱火挑賊。正平二年秋。尊氏令細川顯氏將三

千騎來攻。未至金剛山七里。止舍。聞正行且攻箭尾城也。欲俟其離山而絕其後。正行諜知之。以七百人行火聚落。為向箭尾。而還伏于譽田林。敵望火起。輒趨山下。亂隊疾馳。過林。遇伏起。大駭敗走。退守天王寺山。名時氏以六千騎來援。軍于住吉。正行曰。先破時氏。則顯氏不戰而走。分兵二千為五隊。進向住吉。時氏分兵當之。正行視北軍塵起。曰。敵陣四處。而衆倍於我。我不可分兵也。乃復合五隊為一。疾行擊時氏麾下。時氏被創。走歸顯氏。顯氏軍亂走。過渡部。溺者無數。京畿震駭。正行援溺卒五百人。與衣甲。禮而遣之。多願留仕者。正行遂進逼京師。尊氏大懼。乃發

一無帥
字一無
南字

二十餘州兵。以高師直統諸將帥。以南擊正行。正行與弟正時。率諸宗族詣行宮。因中納言藤原隆資。上言曰。先臣正成。嘗以微力挫強賊。以安先帝宸憂。及天下再亂。逆賊四襲。遂致命於湊川。臣時年十一。命歸河內。囑以收合餘燼。報復國讐。臣年已壯矣。而稟性羸弱。常念不及今力戰。以有待之身。罹無虞之疾。上為不忠之臣。下為不孝之子。而今賊渠帥大舉來犯。是真臣致命之秋也。非臣獲彼首。則授臣首於彼。臣生死決於今日。切希得一拜天顏而行。隆資入奏。帝揭簾臨視將士。前正行。勞之曰。曩日兩捷。大殺賊勢。甚慰朕心。朕深嘉汝世忠。今賊悉銳而來。真安危

淚一作
泣

之決矣。雖然。兵之進退。貴於從宜。朕以汝為股肱。汝其自愛。正行俯伏垂淚而出。辭訣後。醍醐帝廟。題族黨百四十三人姓名於廟壁。然後上途。帝使隆資援之。明年正月。北軍至。四條畷。分為五隊。四隊在前。左右相向。而師直中軍。遙居其後。兵凡八萬騎。正行使隆資綴賊前軍。而自將三千騎。直指其中軍。賊前隊馳而遮之。正行以先鋒擊破。而過賊隊。又至。與我後軍戰。我後軍終敗走。正行不顧。以三百騎直前。賊將細川清氏。仁木賴章等。更進遮鬪。正行盡破之。乃聚其騎馬。皆重傷。乃舍馬。踞隴而餉。賊眾環視。不敢迫。開其走路。皆合於中軍。正行餉畢。起謂眾曰。必與師

三一作

弗一作

直決死。進衝其中堅。我兵殊死戰。無不一以當百。賊軍披靡。正行進逼師直。師直臣僞稱師直死。正行大喜。拋首于空。而手承者三。軍士有告其實者。正行投頭于地。蹴且罵曰。唉。汝亦無雙國賊矣。已而曰。其勇可嘉也。自斷袖裹首。置隴上。復進索師直。望見其幟。欲追之。正朝曰。彼騎我步。不可及也。不若佯走誘之。乃與殘兵五十餘人。負楯以北。師直不肯追。令其裨將以數百騎尾擊之。正行大呼返戰。追走復逼師直。相去數步。而我兵自晨至晡三十餘合。力索莫能起。正行注目於師直。勉眾前進。敵連射之。正行身被箭如蠅。乃呼曰。已矣。勿為賊所獲。與正時相刺。北向而

斃。年二十二。餘兵皆自刃。駢斃。和田賢秀。正朝弟也。獨混敵卒。伺擊師直。楠氏卒湯淺者。降在賊軍。識見賢秀。從後斬之。賢秀瞋眼視湯淺。湯淺懼。後獲疾死。正朝欲還奏狀。有一賊呼曰。忍獨亡乎。正朝笑而返之。賊乃走。如此者數。賊數騎至。正朝遂死。於是百四十三人悉死之。賊軍進犯行宮。帝逃入穴。生賊縱火索之。正行弟左衛門尉正儀。出兵於石川。與高師泰相持。師直則不敢深入。引兵而去。四年。畠山國清來代師泰。正儀益堅守。五年。足利直義與尊氏有隙。乃來降。朝議納為大將。國清等附之。六年。詔正儀助直義。擊尊氏京師。走之。已而直義叛去。遂走關東。尊氏

三一作
二非

欲往擊之。而恐楠氏窺後也。則使子義詮佯降請帝歸闕。帝知其情亦佯許之。尊氏乃東。七年正月。正儀與族和田正忠等將兵七千。奉乘輿軍于男山。兒島高德時削髮來在吉野。奉密詔往促東北諸將。拜宗良親王為征東將軍。使並來援。北畠顯能顯信弟也。為伊勢守。舉兵數千先來援。自鳥羽入。正儀正忠將五千人。夜涉桂川。至大宮。黎明賊將細川顯氏來迎。我兵圍擊。斬其從子八郎。細川賴春繼至。巷戰。正儀接楯為梯。升屋下射。賊兵卻。縱騎乘之。賴春馬驚而墮。正忠兵槍刺殺之。義詮遂走近江。帝使人取北朝三帝置軍中。當是時。將軍宗良率新田氏族擊尊氏。

於武藏不利。義詮得兵三萬。返陣東山。顯能三退其陣。賊軍進攻男山。帝召正儀正忠等拒戰。正忠年十六。入奏曰。建武以來。臣族類大半為此賊所殺。今日之戰。公討國賊。私復家仇。不斬其一將。不復還謁。與正儀合兵三千。據荒坂。細川清氏土岐康貞以六千騎仰攻。康貞有驍名。先衆而進。正忠揮薙刀斬之。乃還謁。遂與正儀拒更科。不利。左兵衛督藤原康長夜襲敗賊營。而賊圍男山益密。正儀正忠受詔還河內。聚兵夾攻。會正忠疾作暴卒。正儀未發。賊急犯行在。帝擐甲上馬。潰圍南走。賊兵追之甚急。藤原隆資以下三百餘人死之。箭及御鎧。藤原康長力戰得達吉

野。委神鏡於路。名和長生收之而還。將軍宗良。及新田桃
丸氏自東北。土居得能氏自西南。並入援。聞男山陷。皆還。
是役也。賊將山名時氏有功而無賞。怒而來降。足利直冬
亦降。請攻京師。詔令諸將助攻。十一月。正儀等擊賊將佐
佐木秀綱于渡部。敗之。八年。六月。諸軍攻京師。正儀以弓
手五百挑戰。時氏繼之。遂擊走義詮。時氏等以兵寡引還。
十年。直冬時氏復發兵擊尊氏。走之。正儀時氏與義詮戰
于播磨。糧盡引還。是歲。將軍宗良與仁科足助諸族起兵。
少應者。北畠顯信爲結城氏所攻。走歸吉野。遂西走。依菊
池武光。武光亦武重弟也。及武重死。嗣統其衆。屢討賊黨。

大友少貳氏。十三年。武光討一色直氏于筑前。大克之。大
友氏時少貳賴尚等皆降。武光時尊氏已死。義詮遣兵助
氏。時賴尚擊武光。武光方討畠山國久于日向。氏時據高
崎。絕其歸途。武光不顧。進攻國久。走之。乃還。氏時不敢要
擊。十四年。賴尚以兵六萬來攻。武光發八千人。奉將軍懷
良。夾筑後河而陣。武光以銳兵先涉。賴尚卻保大原。武光
夜遣子武政等潛兵。因河水亂軍聲。以襲之。獲賴尚二子。
因大戰。懷良被創。北畠顯信等死之。武光身先士卒。馬傷
胄裂。斬一敵將。奪其馬。與胄復進。竟大破之。西南官軍復
振。賊將畠山國清建議。大舉滅楠氏。以奪官軍根本。正儀

與和泉守和田正武詣行宮。奏曰。聞國清舉關東之甲。已至京師矣。而臣知其莫能爲也。兵道有三。曰。天時。地利。人和。明歲大將軍星在西。而彼自東來。違天時也。我所居。負山帶河。形勢深阻。毋論千窟之圍。爾後敵五來。皆敗。違地利也。國清借公營私。爲等儕所嫉。違人和也。三者皆違。雖有百萬。何能爲。請徙御金剛山。臣等拒石川。使別將出龍門。時出輕兵。出沒散合。使敵不知我所在。東兵慄悍。氣屈而退。退卽追之。必大克。帝從之。明年春。正儀等修平岩箭尾龍泉三城。益樓堞。張形勢。而自居于赤坂。義詮國清合兵三十萬入犯。軍于筒山。以逼楠氏。以一軍自龍門入。大

納言藤原隆俊擊克之。賊更兵來攻。隆俊大敗走。帝遣將軍興良援之。興良叛。應義詮燒行宮。據銀嵩。帝令前關白藤原師基討走之。龍泉城將措疑兵而退。賊不敢迫。至五十餘日。乃攻取之。遂攻陷平岩箭尾。合軍圍赤坂。正儀欲退守金剛山。正武曰。子知鼠乎。見人則竄。世將笑曰。南人抗天下。而鼠鬪而已。何不一戰以挫賊鋒。然後退。爲未晚也。乃選三百人。約以暗號。夜出斫結城氏營。大戰。不克而入。令衆唱號坐作。有四敵卒雜焉。捕斬之。乃與正儀退入金剛山。賊軍引還。正儀正武出絕渡部橋。攻譽田城。國清復來攻。又退入山。會國清與仁木義長相惡。賊中大騷。我

兵爭起。國清東歸。正儀攻水速城。拔之。官軍乘勝連下諸城。義長來降。帝北幸住吉。詔征東將軍宗良發兵入援。以岐蘇早雪不果。十五年。征西將軍懷良與菊池武光以兵三千出宰府。少貳賴尚大友氏時與松浦黨謀夾攻武光。武光縱反間。因襲松浦軍。敗之。賴尚等亦走。去歲之役。賊將赤松光範有功。而佐佐木道譽譖之。奪其攝津守護。國人憤怒。正儀正武伺知之。九月。以兵五百出軍于天神林。佐佐木秀詮與弟氏詮以千餘騎渡神崎橋。正儀等使人行呼曰。南軍自西來矣。秀詮聞之。回馬西嚮。徑田單列而行。正儀遣輕卒三百夾射之。賊兵爭徑欲還。正儀正武薄

細川諸
本誤作
山名

擊走之。斬秀詮氏詮溺水者二百餘人。正儀援之。給衣遣歸。細川清氏亦與道譽惡。遂來降。奏曰。義詮兵西拒山名時氏。東拒仁木義長。臣請乘虛復京師。帝詔之。正儀正儀對曰。王師嘗攻京師。五得而五失。今苟欲得之。臣一人力可辦。何假清氏為。獨病復失之耳。行宮君臣皆戀故都。遂令正儀與清氏共攻京師。義詮不戰而走。未幾。義長敗。時氏退。而義詮軍振。欲犯行宮。絕我軍後。我軍留京師二十六日而還。清氏戰死。讚岐四國悉叛。正儀正武議曰。近日之勢。不可坐視。須一戰以振諸國官軍氣也。八月。以騎八百。土兵數千。軍神崎株瀨二處。賊分兵阻水拒之。正儀等

張篝火其營。而潛兵涉三國渡。遶出賊背。賊謂北軍來援也。天明。顧視其旗皆菊水。菊水者。楠氏號也。而大驚潰。太正儀正式進拔赤松氏一城。火兵庫而還。於是北畠顯能與仁木義長並略伊勢。菊池武光略筑紫。義詮遣足利氏經充鎮西探題。武光使弟武義族重經將兵逆擊之。武義傷走。重經更進。斬少貳賴資。武光繼至。軍于豐後府。擊走氏經。十九年。大內弘世以周防長門叛。降義詮。并厚東氏邑。厚東怒。降於武光。與弘世戰。豐後走之。已而武光病卒。子武政襲肥後守。山名時氏仁木義長亦降義詮。官軍不振。二十三年。天皇崩。皇太子寬成即位。是爲長慶。天皇天

皇建德二年。賊將細川賴之。大舉入寇。和田正武率楠氏族堅守諸城。賊軍引還。文中二年。細川氏春復入寇。大納言藤原隆俊死之。天皇讓位於皇太弟熙成。是爲後龜山天皇。天皇幼聰敏。人冀興復。而楠氏衰。國勢日削。義詮既死。子義滿嗣。勢益張。我將士多叛。降北朝。紀伊諸城陷。三年。關東賊兵屢攻。征東將軍宗良於信濃。宗良不能拒。走歸吉野。東北無復官軍。征西將軍懷良猶依菊池氏。保守一隅。先是。明主朱元璋使使來征西府。以其書辭無禮。卻不納。明主更貽書於北朝。北朝納之。以征西府梗其往來。遣今川貞世充探題來攻。菊池武政與其子武朝相繼拒

戰屢克之。已而懷良與武政武朝前後皆病卒。西南無復官軍。於是義滿專圖楠氏。天授四年遣山名氏清等入寇。楠氏族橋本正時シゲタカ神宮正種等力拒。不克而退。六年和田正武病卒。弘和二年正儀亦卒。當是時官軍所保獨金剛山一城而已。元中九年義滿使畠山義深將數千騎來攻金剛山。四絕糧道。城兵僅數十人。飢不能戰。賊急薄之。城兵逃走。匿十津川。自正成築城焉。凡六十年。乃為賊兵所陷。義滿乃使大内義弘來講和議。約傳神器於北朝。則兩統更立。遂許之。是年冬遂備法駕發吉野。御于大覺寺。以父子禮授神器于後小松帝。後七年義弘揚兵於和泉。擊

按義弘揚兵後十三年為應永十九年。是歲後小松讓位於稱光。耳後二十一年。園永亨五年。崩此言後小松崩誤。

足利氏楠正秀以兵百餘屬之。正秀者蓋正儀子也。菊池氏北畠氏餘孽亦來屬焉。戰敗散歸。後十三年後小松崩。後龜山皇子當立。足利氏乃立後小松皇子。是為稱光帝。楠氏及北畠氏並訴之。欲如約。足利氏弗聽。則並起兵。足利氏約。帝後當傳於南朝皇子。乃止兵。及稱光崩無嗣。足利氏復索北朝皇族立之。後龜山天皇之子曰小倉者。自京師走伊勢。依北畠氏起兵。戰敗講和。歸京師。削髮入萬壽寺。又十餘年。歲癸亥。足利氏內亂。楠二郎收南國兵。得三百人。奉萬壽寺金藏主者為主。分兵為二隊。二郎自將一隊。而越智某將一隊。夜入大内。取三神器。内侍鏡為東

門衛士所奪寶劍遺於清水寺側。獨擁神璽。據叡山中堂。足利氏管領畠山基國遣兵來攻。二郎與越智皆戰死。金藏主自殺。二郎者不詳其所出也。二郎殘兵以神璽奉後醍醐帝曾孫某。保吉野。歲戊寅。赤松氏遣臣二人詐來仕。弒皇曾孫。從者追殺一人。其一人遂奪璽而去。先是後村上天皇子泰成生圓胤。為圓滿院僧正。蓄髮更名義有。癸亥之難。楠二郎之弟某奉義有起兵。據八幡。迎擊畠山氏兵。大破之。細川氏來攻。楠氏不利。退入紀伊。據湯淺城。歲丙寅。畠山氏將游佐來攻。楠氏又擊破之。丁卯冬。游佐復聚兵來攻。城終陷。義有遇害。楠某死之。楠氏之事終於此。

一無私字

母復所親。名和兒。島土居得能氏。蓋先楠氏而亡。後楠氏而存者。菊池。北畠氏。菊池氏數世。至義宗者乃亡。北畠氏十餘世。至具教者乃亡。此二氏者。自楠氏衰。皆降足利氏。或曰。楠正儀亦降足利氏。蓋有深謀焉。史乘散佚。不可考信。要之。正成宗族。與後醍醐皇統相成終始。楠氏亡而後二百餘年。權中納言源光國。私立石于湊川。題曰嗚呼忠臣楠氏之墓。

外史氏曰。余數往來攝播間。訪所謂櫻井驛者。得之山崎路。一小村耳。過者或不省其為驛趾。蓋經足利織豐數氏。世故變移。道里驛程。隨輒改耳。余於是低回不能去。顧望

金剛山巖立雲際。想見公舉義之秋。及其子孫據以扞護
王室也。觀公詣行在對天子。曰。臣而未死。賊不患不滅。夫
以一兵衛尉。而居然以天下之重自任。豈非感激值遇。以
身許國哉。故能以赤手障江河。回天日於既墜。何其壯也。
公聚北條氏精銳於一城之下。而使新田足利之屬。擣其
空虛。以殪其渠魁。帝之復辟。疇爵任職。宜以公爲首。而纔
能與結城名和輩比肩。其失於舉措。足以知中興之無成
矣。及足利氏叛。朝廷方倚新田氏爲重。公特充褊裨。供其
驅使。亦以其門地有不若焉爾。然京師大捷。殆致掃殄者。
非因公之策邪。嚮使帝以其所任新田氏者。以任於公乎。

曷至使犬羊狐鼠之賊蹂踐吾朝廷哉。然觀其臨死戒子。
又曰。吾死。天下悉歸足利氏。夫知天下之不可爲。而猶留
其子孫。以衛天子。其設心。雖古大臣。何以遠過。故子孫能
守其遺訓。護正統天子於彈丸黑子之地。以防四海寇賊
者。及三朝五十餘年之久。舉一門之肝腦。而竭諸國家之
難。至其漸盡灰滅。而後足利氏始得大成。其志於天下。蓋
朝廷不能大任楠氏。而楠氏所以自任。莫以加焉。世之論
中興諸將。尚視其資望大小。而不深揆其實。亦與當時之
見等耳。不有楠氏。雖有三器。將安託焉。以繫四方望哉。笠
置夢兆。於是益驗。而南風不競。俱傷共亡。終古莫以恤其

勞。悲夫。抑正閏雖殊。卒歸於一。能熙鴻號於無窮。使公有
 知。亦可以瞑矣。而其大節巍然。與山河並存。足以維持世
 道人心於萬古之下。比之姦雄迭起。僅傳數百年者。其得
 失果何如哉。

日本外史卷五終

昭和三年四月二十日印刷
 昭和三年四月三日發行

校刻日本外史奧附
 定價金壹圓

著者 故 賴 山 陽

覆製兼發行者 野 田 文 之 助

印刷者 尾 藤 光 之 介

印刷所 東京市神田區表猿樂町二番地
 株式會社 開明堂東京支店

東京市神田區今川小路二丁目

發行所 松 雲 堂 書 店

振替東京五〇七〇九番

318
 188

終